



梁劉孝綽集

應令詠日

弭節馳暘谷照檻出扶桑園葵亦何幸傾葉奉
離光

望月有所思

秋月始纖纖微光垂出簷
臃入牀簟彷彿鑑
窓簾簾螢隱光息簾蟲映光纖
玉羊東北上金
虎西南昃長門隔清夜高堂夢容色如何當此
時懷情向胸臆

林下月影

明明三五夜垂影當高樹攢柯半玉蟾衰葉映
金兔茲林有夜坐嘯歌無語晤側光聊可書含
毫且成賦

秋雨卧疾

賈君徭役少潘生民務稀及此同多暇高臥掩
重闌寂寂桑榆晚滂沱暄不晞電隙時光帳風
簾乍扣扉或作飛

對雪

桂華殊皎皎柳絮亦霏霏詎比咸池曲飄飄千
里飛耻均班女扇羞儼曹人衣浮光亂粉壁積

照朗彤闈

風

嫋嫋秋聲習習春吹鳴茲玉樹渙此銅池羅帷
自舉襟袖乃披慙非楚侍濫賦雄雌

上虞鄉亭觀濤津渚學潘安仁河陽縣
詩

昔余筮賓始衣冠仕洛陽無貲徒有任一命忝
為郎再踐神仙側三入宗賢旁東朝禮髦俊虛
薄廁才良遊談侍名理擗管創文章引籍陪下
膳橫經叅上庠誰謂服事淺契濶變炎涼一朝

謬爲吏結綬去承光享鮮徒可惜治民終未長
化雞仰季智馴雉推仲康北城隣夏穴捕蠹茂
筠篁孝碑黃絹語神濤白鷺翔遨遊佳可望釋
事上川梁秋江凍雨絕反景照移塘織羅殊未
動駭水忽如湯乍出連山合時如高蓋張漂渺
一作沙黃沫聚礫石素波揚榜人不敢唱舟子詎
能航離家復臨水眷然思故鄉中來不可絕奕
奕苦人腸沂泗若無阻謝病反清漳

太子狀落日望水

川平落日迥落照滿川洋復在淪波地派別引

沮漳耿耿流長脉熠熠動輕光寒鳥逐槎泛鷺
鵜拂浪翔臨流自多美况此邊故鄉榜人夜理
檝櫂女闈成裝欲待春江曙爭塗向洛陽

夕逗繁昌浦

日入江風靜安波似未流岼迴知舳轉纜解覺
船浮暮烟生遠渚夕鳥赴前洲隔山聞戍鼓傍
浦喧棹謳疑是辰陽宿於此逗孤舟

侍宴餞庾於陵應詔

皇心眷將遠帳餞靈芝側是日青春獻林塘多
秀色芳卉疑綸組嘉樹似雕飾游絲綴鶯領光

風翔綺翼下輦朝既盈留宴景將昇高談競辨
端竒文爭筆力伊臣獨無伎何用奉嘆息

侍宴餞張惠紹應詔

滄池誠自廣蓬山一何峻麗景花上鮮油雲葉
裏潤風度餘芳滿鳥集新條振餞言班俊造光
寵私輒恡徒然謬反隅何以窺重仞

侍宴二首

清宴延多士鴻私濫微薄臨炎出蕙樓望辰躋
茵閣上征切雲漢俛眺周京洛城寺鬱參差街
衢紛漠漠禁林寒日晚方秋未搖落皇心重發

志賦詩追並作自昔承天寵於茲被人爵選言
非綺縮何以儼金釧

又

茲堂乃峭嶠伏檻臨曲池樹中望流水竹裡見
攢枝欄高景難敞岫隱雲易垂邂逅逢休幸朱
躡曳青規丘山不可答葵藿空自知

三日侍華光殿曲水宴

薰祓三陽暮濯禊元巳初皇心睠樂飲帳殿臨
春渠豫遊高夏諺凱樂盛周居復以焚林日丰
茸花樹舒羽觴環堦轉清瀾傍席踈妍歌已寥

亮妙舞復紆餘九成變絲竹百戲起龍魚

春日從駕新亭應制

旭日輿輪動言追河曲遊紆餘出紫陌迤邐度
青樓前驅掩蘭徑後乘歷芳洲春色江中滿日
華巖上留江風傳葆吹巖花映采旂臨渦起睿
作駟馬暫停輶侍從榮前阮雍容慙昔劉空然
等彈翰非徒嗟未適

餞張惠紹應令

鮮雲積上月凍雨晦初暘迴風翻淑氣落景煥
新光竹萌始防露桂樾已含芳瑤階變杜若玉

沼發攢蔣聖襟惜岐路曲宴闢蘭堂

侍宴離亭應令

輟轅東北望江漢西南永羽旗映日移鏡吹臨
風警令王愍追送纒舟宴俄頃掩袂眺征雲銜
盃惜餘景首燕徒有心局步何所騁

侍宴集賢堂應令

北閣時既啓西園又已闢官屬引鴻鷺朝行命
金碧伊臣獨何取隆恩徒自昔布武登玉墀委
坐陪瑤席綢繆叅宴咲淹留奉觴驛壺人告漏
晚烟霞起將夕反景入池林餘光映泉石

班婕妤怨

應門寂已閉非復後庭時况在青春日萋萋綠
草滋妾身似秋扇君恩絕履綦誰憶遊輕輦徒
令賤妾辭

又

寂寂長信晚雀聲愁洞房蜘蛛網高閣駮薜被
長廊虛殿簾帷寂閑堦花蕊香悠悠視日暮還
復守空床

銅雀妓

雀臺三五日絃吹似佳期况復西陵晚松風吹

總帷危絃斷復續妾心傷此時誰言留客袂還
掩望陵悲

古意

燕趙多佳麗白日照紅粧蕩子十年別羅衣雙
帶香青樓怨難守玉堦悲自傷復此歸飛燕銜
泥繞曲房差池入綺幕上下傍雕梁故居猶尚
爾故人何可忘相思昏望絕宿昔夢容光魂交
忽在御轉側定他鄉徒然顧枕席誰與同衣裳
空使蘭膏夜炯炯對餘霜

烏夜啼

鷓絃且輟弄鶴操暫停揮別有啼鳥由東西各
自飛倡人怨獨守蕩子殊未歸忽聞生離唱中
夜泣羅衣

釣竿篇

釣舟畫彩鷁漁子服水紉金轄菜萸網銀鈎翡翠竿促棹一作欵隨水脉急艇一作槩渡江湍湍長自不辭前浦有佳期船交撓合影浦深魚出池荷根時觸餌菱芒乍罾絲蓮渡江南手衣踰京兆眉垂竿自有樂誰能為太師

秋夜詠琴

上宮秋露結上客夜琴鳴幽蘭暫罷曲積雪更傳聲

簫

危聲合歌鼓絕弄混笙篴管饒知氣促釵動覺唇移仙史安為貴能令秦女隨

武陵殿下看妓

燕姬奏妙舞鄭女發清歌迴羞出慢臉送態表
嚙螿寧殊遇行雨詎減見凌波想君愁日落應
羨魯湯戈

酬陸長史倂

王粲始一別猶且歎風雲况余屢之遠與子丞
離群如何持此念復爲今日分分悲宛如昨弦
望殊揮霍行舟雖不見行程猶可度度君路應
遠期寄新詩返相望且相思勞朝復勞晚薄暝
闈人進果得承芳信殷勤覽妙書留連披雅韻
列洲財賦物慈山行旅鎮已切臨睨情遽動思
歸引歸歟不可即前途方未極覽諷欲諛誚研
尋還慨息來喻勗雖金比質非所任虛薄無時
用徘徊守故林屏居青門外結宇霸城陰條開
風暫入葉合影還沉帷屏溽早露階雷擾昏禽

衡門謝車馬賓席簡衣簪雖愧陽陵曲寧無流
水琴蕭條聊求歌寂寞少知音平生竟何託懷
抱共君深一朝四美廢方見百憂侵日余濫官
守因之泝廬父水接淺原陰山帶荆門右從容
少職事疲病踈僚友命駕獨尋幽淹留宿廬阜
廬阜擅高名岩岩凌太清舒雲類紫府標霞同
赤城北上輪難進東封馬易驚未若茲山險車
騎息逢迎山橫路似絕徑側樹如傾蒙龍乍一
啓磔碗無暫平倚巖忽迴望援蘿遂上征乍觀
秦帝石復憇周王城交峯隱玉雷對澗距金楹

風傳鳳臺瑄雲度洛濱笙紫書時不至丹爐且
未成無因追羽翮及爾宴蓬瀛蓬瀛不可託悵
然反城郭時過馬鳴院偶憇鹿園閣既異人世
勞聊此化城樂影塔圖花樹經臺總香藥月殿
曜朱旛風輪和寶鐸園援即重嶺階基仍巨壑
朝後響薨棟夜水聲帷薄餘景鶩登臨方宵盡
談謔談謔有名僧慧義似傳燈遠師教逾闡生
公道復弘小乘非汲引法善招報能積迷頓已
悟爲歡得未曾爲歡誠已往坐卧猶懷想况復
心所積茲地多諧賞惜哉無輕軸更泛輪湖上

可思不可見離念空盈蕩賈生傳南國平子相
東阿優游匡贊罷縱橫詞賦多微才幸同貫無
令絕永歌幽谷雖云阻煩君計吏過

答何記室遜

遊子倦飄蓬瞻途杳未窮晨征凌迸水暮宿犯
頽風出洲分去燕向浦逐歸鴻蘭芽隱陳葉荻
苗抽故叢忽憶園間柳猶傷江際楓吾生棄武
騎高視獨餘雄旣殫孝王產兼傾卓氏僮罷籍
睢陽園陪謁建章宮紛余似鑿枘方圓殊未工
黑貂久自弊黃金屢已空去辭追楚穆還畊偶

漢馮巧拙良爲異出處嗟莫同若厭蘭臺右見
訪灞陵東

答張左西

相思如三月相望非兩宮持此連枝樹暫作背
飛鴻若人惠思我摘藻蔚雕蟲仙掌方晞露靈
鳥正轉風方假排虛翮相與北山叢

歸沐呈任中丞昉

步出金華省還望承明廬壯哉宛洛地佳麗實
皇居虹蜺拖飛閣蘭芷覆清渠圓淵倒荷芰方
鏡寫簪裾白雲夏峰盡青槐秋葉踈自我從人

爵蟾兔屢盈虛殺青徒已汗司舉未云書文昌
愧通籍臨仰幸第如夫君多敬愛蟠木濫吹噓
時時釋簿領騶駕入吾廬自嗤誠礪硃無以儷
璠璣但願長閒暇酌醴薦焚魚

江津寄劉之遴

與子如黃鵠將別先徘徊經過一柱觀出入三
休臺共摘雲氣藻同舉霞紋杯流入每曉逝禁
門恒晚開欲寄一言別高駕何由來

發建興渚示別陸二黃門

扁舟去平樂還顧極川梁猶聞棗下吹尚識杏

間堂洛橋分曲渚官寺隱回塘客行裁跬步即
事已多傷况復千餘里悲心未遽央

登陽雲樓

吾登陽臺上非夢高堂客回首望長安千里懷
三益顧惟慙入楚殊私等申白西沮水潦收瓊
丘霜露積龍門不可見空慕凌寒柏

詠柑子

朱實挺江南苞品擅珍淑上林雜嘉樹江潭間
脩竹萬室擬封家千株挺荆國綠葉萋以布素
榮芬且郁得陳終懽宴良垂雲雨育

三婦豔

大婦縫羅裙中婦料繡文唯餘最小婦窈窕舞
昭君丈夫慎勿去聽我駐浮雲

賦得始歸鴈

洞庭春水綠衡陽旅鴈歸差池高復下欲向龍
門飛

愛姬贈主人

卧久疑粧脫鏡中私自看薄黛銷將盡凝朱半
有殘垂釵繞落鬢微汗染輕紈同羞不相難對
笑更成歡妾心君自解挂玉且留冠

贈美人

巫山薦枕日洛浦獻珠時一遇便如此寧關先
有期幸非使君問莫作羅敷辭夜長眠復坐誰
知閨歛眉欲寄同花燭爲照遙相思

侍安成王曲水宴

匪繹良孔殷分區屏中縣躡跨無流采衿唯邇
封甸吾王奄豐畢析圭承羽傳不資魯俗移何
待齊風變東山富遊士北土無遺彥一言白璧
輕片善黃金賤餘晨屬上巳清祓追前諺持此
湯瀨遊復展城隅宴芳洲亘千里遠近風光扇

方歡厚德重誰言薄遊倦

報王永興觀田

重門寂已暮案牘罷囂塵輕涼生筍席微風起
扇輪浮瓜聊可貴益絹亦或珍復有寒泉井廉
以瑩心神睽彼忘言客閒居伊洛濱顧已慙困
地徒知薑桂辛但願崇明德無謂德無鄰

過渡浙江

季秋弦望後輕寒朝夕殊商人泣紈扇客子夢
羅襦憂來自難遣况復阻川隅日暮愁陰合繞
樹噪寒鳥濛漠江煙上蒼茫沙嶼蕪解纜辭東

越接觸驚西徂懸帆馳驥飛棹若驚鳧言歸遊
俠窟方從冠蓋衢

夜不得眠

夜長愁反覆懷抱不能裁
披衣坐惆悵當戶立
徘徊風音觸樹起
月色度雲來
下葉依窓落
秋花向座開
光陰已如此
復持憂自催

陪徐僕射晚宴

夫君追宴憇十日
遞來過築室華池上
開軒臨芰荷
方塘交密筍
對雷接籛柯
景移林改色
風去水餘波
洛城雖半日
愛客待驪歌

權歌行

日暮楚江上
江深風復生
所思竟何在
相望徒盈盈
舟子行催棹
無所唱流聲

半夜泊鵲尾

客行三五夜
息棹隱中洲
月光隨浪動
山影逐波流

百舌

山人惜春暮
旭旦坐花林
復值懷春鳥
枝間弄好音
遷喬聲迥出
赴谷響幽深
下聽長而短
時聞絕復尋
孤鳴若無對
百轉似群吟
昔聞屢歡

昔今聽忽悲今聽聞非殊異遲暮獨傷心
見鄰舟人投物衆姬爭之
河流旣浼浼河鳥復關關落花浮浦出飛雉度
洲還是日倡家女競嬌桃李顏良人惜美珥欲
以代芳菅新繡疑故素盛趙滅衰班曳綃爭掩
穀搖珮奮鳴環客心空振蕩喬枝不可攀

淇上戲蕩子

桑中始奕奕淇上未湯湯美人腰雜珮上客誘
明璫日暗人聲靜微步上蘭房露葵不待勸鳴
琴無暇張翠釵挂已落羅衣拂更香如何嫁蕩

子春夜守空床不見青絲騎徒勞紅粉粧

梁劉孝威集

思歸引

胡地憑良馬懷驕負漢恩甘泉烽火入回中宮
室燔錦車勞遠駕繡衣疲奔貳師已喪律都
尉亦銷寬龍堆求援急狐塞請先屯櫪下驅雙
駿腰邊帶兩鞬乘障無期限思歸安可言

塘上行苦辛篇

蒲生伊何陳曲中多苦辛黃金坐銷鑠白玉遂
縑磷裂衣工毀嫡掩袖切讒新嫌成跡易已愛
去理難申秦雲猶變色魯日尚迴輪妾歌已唱

斷君心終未親
金槩木蘭船戲採江南蓮蓮香隔浦度荷葉滿
江鮮房垂易入手柄曲自臨盤露花時濕釧風
莖乍拂鈿
愛妾換馬
驄馬出樓蘭一步九盤桓小使贖金絡良工送
玉鞍龍驂來甚易烏孫去實難麟膠妾猶有請
為急絃彈

東西門行

廣津寒欲歇
聯檣密纜收天高匝近岫江濶少
方舟餞泪留神眷離欵切私儔佇變齊兒俗當
傳楚獻囚徒然頌並命祗惡思如抽

東飛伯勞歌

雙棲翡翠兩鴛鴦巫雲洛月乍相望誰家妖冶
折花枝袖長釧動任風吹金鋪玉鎖琉璃扉花
鈿寶鏡織成衣美人年幾可十餘含羞騁咲歛
風裾珠丸出彈不可追空留可憐特與誰

小臨海

碣石望山海留連降尊極秦帝極鈞陳漢家增

禮秩石橋終不成桑田竟難測蜃氣遠生樓蛟
人近潛織空勞帝女填詐動波神色

半渡溪

本厠偏伍伴一載殄凶渠制賜文犀節驛報紫
泥書入營陳御蓋還家乘紫車皇恩空以重丹
心恨不紓渡瀘且不畏凌溪嗟有餘

鷄鳴篇

埭鷄識將曙長鳴高樹巔啄葉疑彰羽挑花強
欲前意氣多驚舉飄揚獨無侶陳思助鬪協狸
膏郗昭妬對敵安金距丹山可愛有鳳凰金門

飛舞有鴛鴦何如五德美豈勝千里翔

怨詩

退寵辭金屋見譴斥甘泉枕席秋風起房櫳明
月懸燭避窓中影香迴爐上煙丹庭斜草徑素
壁點苔錢歌起蒲生曲樂奏下山絃新聲昔廣
宴餘杯今自傳王嬙向絕漠宗女入邠連鴈書
猶未返角馬無歸年昭臺有媵御曾坂無棄捐
後薪隨復積前魚誰更憐

賀皇太子春林晚雨

雲樹交爲密雨日共成虹雷舒長男氣枝搖少

女風葉珠隨滴水簷繩下溜空蝶飛濡不颺花
沾色更紅明
離信養德能事畢春宮誰堪偶鳳
吹唯有浮丘公

行還值雨又爲清道所駐
齊楚盤石貴韓吳異姓王俱乘早朝罷相隨
建章喧呼驚里閭叫吼駭康莊皂駟同隼擊青
秦以鷹揚掖門南北遠復道東西長旛旗爭駟
官騎鬱相望微風生祭傳輕雨灑帷裳
衣分競道小蓋列成行八舍便繁密五營與復光迴
車避司隸俄軒揖內郎况余白屋士自依卑路

傍日月雖臨照及陋難明揚早榮羞日及晚知
慙豫章徒抱凌雲意終愧摩天翔安能久淪辱
圖南會有方

望雨

清陰蕩暄濁飛雨入階廊瞻空亂無緒望霽耿
成行交枝含晚潤雜月帶新光浮界離還聚沿
漚滅復張浴禽飄落毳風苻散餘香璫綃挂
幕象簾列華牀侍童拂羽扇厨人奉盥觴寄言
楚臺客雄風詎獨涼

賦得曲澗

澗深急易轉溪水暗難開近樓俄已失前洲忽
蕩迴石岸生寒蘚沉根浸水苔羨舟失道去歸
鳥迷徑來華林村童物序風入奉盞難寄言
昇天行二首清風音韻繪香齋詩話
乘橋追術士遠之蓬萊山靈液飛素波蘭桂土
叅天文豹遊其下翔鸞戲其巔垂風忽舉彷彿
見衆僊

又

扶桑之所生乃在朝陽谿中心凌蒼皓布葉蓋
天涯日出登東榦既夕没西枝願得紆陽轡回

日使東馳

結客少年場行

少年本六郡遨遊遍五都插腰銅匕首障日錦
屠蘇鷲尾裝銀鏑犀膠飾象弧近發連雙兔高
彎落九鳥邊城多警急節使滿郊衢居延箭服
盡踈勒井泉枯正蒙都護接何由憚險途千金
募惡少一揮擒骨都勇餘聊蹴踘戰罷暫投壺
昔爲北方將今成南面孤邦君行負弩懸令且
前驅

行行且遊獵篇

之果講射所上林娛獵場選徒嬌楚客召狩誇
胡王罕車已戒道風烏復啓行欣飛具矰繳材
官命蹶張高且掩月兔勁矢射天狼蹠地不遑
逸排虛豈及翔日暮勾陳轉風清鏡吹颺歸來
宴平樂寧肯滯禽荒

隴頭水

從軍戍隴頭隴水帶沙流時觀胡騎飲常爲漢
國羞鬻妻成兩劍殺子祀雙鈎頓取樓蘭頸就
解郵支裘勿令如李牧一作廣功多遂不酬一作功遂
侯不封

蜀道難

玉壘高無極銅梁不可攀雙流遂蹙道九坂澁
陽關鄧侯束馬度王生斂轡還斂轡懼身尤叱
馭奉王猷若恠千金重誰爲萬里侯戲馬吞珠
界揚舲濯錦頭沉犀厭怪水掘鏡表吳丘禹山
金碧有光輝遷亭車馬尚輕肥彌想王褒擁節
反更道相如乘傳歸君平子雲聞不嗣江漢英
靈信已衰

奉和簡文帝太子應令

太子天下本元良萬國貞周朝推上嗣漢代懸

重明前星涵瑞彩
海雷揚遠聲
三善傳樂正
百行紀司成
九流遍已辨
七經咸所精
博聞強子政
高才陵長卿
禮尊逾屈已
德盛益卑情
仙菊貽鍾相
儒道推桓榮
延賢博望苑
視膳長安城
園綺隨金輅
浮丘侍玉笙
智囊前歛笏
端士後垂纓
九仙良所重
四海更垂纓
班輪同策乘
甲館齊蓬衡

奉和六月壬午應令

玄圃棲金碧
虛澗浥琨瑤
築山圖碣岫
穿池控海潮
雷奔石鯨動
水濶牽牛遙
乘龜猶怯渡
鞭

石詎成橋崖崩下
生窟壁峭上千霄
噪蛙常獨拂游魚
或自跳荒徑橫臨
浦空舟斜插橈愁
鷗集古樹白鷺隱
青苗神心重丘壑
散步懷漁樵石累
元卿徑枝挂許由
瓢伊臣本寂寞由
來畏市朝爲貪山水
心所競唯逍遙寄
言周伯况勞君擅
縠綃

幸甘泉宮歌

漢家近夏畢避暑
甘泉宮機車鳴里
鼓駟馬駕相風校
尉烏桓騎待制樓
煩弓後旌猶五柞
前笳度九峻才人
豹尾內御酒屬車
中輦迴百子

閣扇動七輪風鳴鐘休衛士披圖召後宮材官
促校獵涼秋戲射熊

鳥生八九子

城上烏一年八九雛枝輕巢本狹風多葉早枯
毳毛不自暖張翼強相呼金柝嚴兮翠樓爾蜃
壁光兮椒泥馥虞機衡網不得施猜鷹鷲隼無
由逐永願共棲曾氏冠同瑞周王屋莫啼城上
寒猶賢野中宿羽成翮倏各西東丁年賦命有
窮通不見高飛帝輦側遠託日輪中尚逢王吉
箭猶嬰后羿弓豈如變彩救燕質入夢祚周作

昭公流聲表師退集幕示營空靈臺已鑄像流

蘇時候風

鬪雞

丹雞翠翼張如敵復專場翅中含芥粉距外躍
金芒氣踰上黨烈名貴下韞良祭橋愁魏后食
跖忌齊王願賜淮南藥一使雲間翔

雀乳空城中

遠去條支國心知漢德休聊栖丞相府過令黃
伯羞挾子湏閑地空井共尋求轆轤絲綆絕桔
槔金蘇稠將伶羽翼長誰辭各背遊

妾薄命篇

去年從越障今歲沒胡庭嚴霜封碣石驚沙暗
井陘玉簪久落髮羅衣長挂屏浴蚕思沫水條
桑憶鄭垞寄書朝鮮吏留釧武安亭勿言戎夏
隔但令心契冥不見豐城劍千祀復同形

驄馬驅二首

十五官期門二十屯邊徼犀羈玉鏤鞍寶刀金
錯鞘一隨驄馬驅分受青蠅弔且令都護知願
被將軍照誓使羶衣鄉掃地無遺燠

又

翩翩驄馬驅橫行復斜趨先救遼城危後拂燕
山霧風傷易水湄日入壘西樹未得報君恩聯
翩終不住

釣竿篇

試持玄渚鈎暫罷池陽獵翠羽飾長綸藻花裝
小艤鈎利斷蓴絲帆舉捧綸葉聯載前魚童還
看後舟妾

公無渡河

請公無渡河河廣風威厲檣偃落金烏舟傾沒
犀柁紺蓋空嚴祠白馬徒生祭街石傷寡心崩

城掩孀袂劍飛猶共水
冤沉理俱逝君爲川后
臣妾作江妃姊

苦熱

日暮苦炎溽遷坐接長廊
月麗姮娥影星寒織
婦光棲禽動夜行流螢出
閣墻香盤糝鮮粉雕
臺承蔗漿白羽徒搖幄
綠水自周堂弱紈猶覺
重織絺尚少涼弄風思
漢朔戲雨憶吳王玄冰
術難驗赤道漏猶長誰
能更吹律還令暑谷涼

獨不見

夫婿結纓簪偏蒙漢寵
深中人引臥內副車遊

上林綬染瑯琊草蟬鑄
武威金分家移甲第留
妾住河陰獨寢鴛鴦被
自理鳳凰琴誰憐雙玉
筋流面復流襟

同集徐晉安兒宅

夫君退宴喜十日遞來
過築室華池上開軒臨
芰荷方塘交密篠對霽
接繁柯影移林改色風
度水餘波洛城雖半掩
愛客待驪歌

篋篋謠

結交在相得骨肉何必
親甘言無忠實世薄多
蘇秦從風暫靡草富貴
上昇人不見高巔樹摧

抗下爲薪豈甘井中泥時至出作塵

帆度吉陽州

江風凌晚急征鼓候晨催幸息榜人唱聊望高
帆開聯村倏忽盡循汀俄頃回疑是傍州退似
覺前山來將與圖南競誰云勞泝洄

過康王第苑

入梁逢故苑渡薛想餘宮尚識招賢閣猶懷愛
士風靈光一超曠遠館復蒙籠洞門餘舊色甘
棠留昔叢送悲禽不去過客暮難窮池竹徒如
在林堂暖已空遠樓隔樹出迥澗隱崖通芳流

小山桂塵起大王風具物咸如此是地感余衷
空想陵前劔徒悲壘上桐

望棲鳥

夕鳥飛參差單雄雜寡雌聯翩歸葉裡出沒噪
林垂爭棲時易樹驚飛忽度枝雖無繫書重亦
有含纓疲以茲憔悴力重逢輕薄兒珠元蘇合
彈金繳青絲縻豈意翩翹羽遂免更羸危入懷
欣得地依林竊願知

登覆丹山望湖北

紫川通太液丹岑連少華堂皇更隱映松灌雜

交加荇蒲浮新葉漁舟繞落花浴童爭澡岼漂
女擇平沙極望傷春目迴車歸峽斜

侍宴林光殿曲水

蒸哉軒頊赫矣堯心女媧補石重華棄金湯羅
禹扇羲瑟農琴皇乎脩矣受命君臨試舟五反
和樂九成鈎楯密戲協律新聲丹杯水激絳彩
榮天吳還徃海若逢迎

望隔墻花

隔墻花半隱猶見動花枝當由美人摘詎止春
風吹

重光詩

赫赫重光明明二聖帝作儲述禮和樂正中衢
置高堂懸鏡其酌不窮其明愈盛德音孔昭
民胥儲祥明明二聖赫赫重光風神灑落容止
汪洋瞻彼談扇載抑載揚何期天辯如圭如璋
頽閔函席游夏升堂以卿以士惟公惟王思媚
儲后顧哉樂康芄芃黍苗陰雨膏之洗洗纓冕
儲王導之道之以禮齊之以仁理則採聖言則
窮神訓于四國覃于萬民

郟縣遇織人寄婦

妖姬含怨情織緯素一作起秋聲度梭環玉動踏
躡珮珠鳴經移疑杼澁緯斷恨絲輕葡萄始欲
罷鴛鴦猶未成雲棟共徘徊紗窓相向開睂踈
眉語度紗輕眼笑來籠籠隔淺紗的的見粧華
鏤玉同心帶雜寶連樹花紅衫向後結金簪臨
髮斜機項挂流蘇機傍垂結珠青絲引伏兔黃
金繞轆轤艷彩裙邊出芳脂口上渝百城交問
遺五馬共踟躕直爲閨中人守故不要新夢啼
漬花枕覺淚濕羅巾獨眠真自難重衾猶覺寒
玄憶凝脂緩彌想橫塵歡行驅金絡騎歸就城

南端城南稍有期想子亦勞思羅禕久應罷花
釵堪更治新粧不點黛余還自畫眉

七夕穿針

縷亂恐風來衫輕羞指見故穿雙眼針時縫合
懽扇

枯葉竹

枯楊猶更綠卧柳尚還生勿嫌鳳不至終當待
聖明

春宵

花開人不掃節暖衣隨變迴釵挂反環拭淚繩

春
今夜月輪圓胡兵必應戰

和簡文帝卧疾

玉躬耗寒暑群望崇珪璧仁祀盛黃纁禮壇優
紺席憊君楚疾愈俄同宋年益豈勞誦賦臣寧
用觀瀾客

織女

金鈿已照耀白日未蹉跎欲待黃昏至含嬌渡
淺河

九日酌菊酒

露花凝始摘羅衣自適重餘林度不取欲持嬌

使君

冬曉

妾家邊洛城慣識曉鐘聲聲聲猶未盡漢使報
應行天寒硯水凍心悲書不成

奉和逐涼

鐘鳴夜未央避暑起徬徨長河似曳素明星若
散璫倚岩欣石冷臨池愛水涼月織張敞畫
妖韓壽香對此遊清夜何勞娛洞房

奉和晚日

虬簷挂珠箔虹梁卷霧綃迷迭函香長芙蓉

浪搖飛輪轉羽扇翻車引落潮甘泉推激水迎
風愁遠颯寄言王待詔因聲張子僑吾君安已
樂無勞誦洞簫

梁劉孝威集終

梁沈約集

郊居賦

惟至人之非已固物我而自忘自平智以下愚
咸得性以爲場伊吾人之褊志無經世之大方
忽依林而羽戢願託水而鱗藏值龍顏之鬱起
乃馮風而矯翼指皇邑而南轅駕脩衢以騁力
余平生而耿介實有心於獨徃思幽人而軫念
望東臯而長想本忘情於循物徒羈紲於人壤
應屬歎於牽幽陸興言於世網爾乃傍窮野指
荒郊編霜莢葺寒茅構栖噪之所集築町畦之

所交因犯檐而列樹由妨基而剪巢織宿楚以
成門藉外靡而爲戶旣取陰於庭樾又因籬於
芳杜草則蘋萍芡芰菁藻蘆蕭敷石衣海髮黃荇
綠蒲動紅荷於輕浪覆碧葉於澄湖其陸卉則
紫蘂綠葭天菁山韭鴈齒鹿舌牛唇蔬肩若乃
園林殊制田圃異區李衡則橘林千樹石崇則
雜果萬株茲豪情之所侈非儉志之所娛欲令
紛披蔚鬱吐綠攢朱開丹房以四照舒翠葉而
九衢其林鳥則翻泊頡頏遺音上下楚雀多名
流鶯雜嚮或斑尾而綺翼或綠襟而絳頰好葉

隱而枝藏乍間關而來往其水禽則大鴻小鴈
天駒澤虞秋鷺寒鷺脩鷁短鳧翅碎流而起沫
翼鼓浪而成珠其魚則赤鯉青魴纖儵巨鱖碧
鱗朱尾脩顛偃額小則戲渚成文大則噴流揚
白惟鍾巖之隱鬱表皇都而作峻蓋望秩之所
宗合風雲而起潤孤嶝橫插洞穴斜經千丈萬
仞三襲九成亘繞州邑欵跨郊垌素烟晚帶白
霧晨榮近循則一巖異色遠望則百嶺俱青時
言歸于陋宇聊假日以翱翔獸依庭而莫駭魚
物沿而不綱曉對開花初英落蓋異林而分丹

素因風而雜紅紫紫蓮夜發紅荷曉舒輕風微
動芬芳襲余水懸埴而帶坻雪縈松而被野鴨
也飛而不散鴈高翔而欲下傷余情之頽暮憂
與愁其相溢悲異軫而同歸歡殊方而並失時
復寄情魚鳥歸間蓬華旁闕吳娃前無趙瑟准
以天地之恩不報書事之官不述徒重於高門
之地不載於良史之筆長太息以何言羞愧心
之非一

高松賦

鬱彼高松栖根得地記北園於上邳依平臺而

養翠若夫蟠株聳榦之懿含星漏月之竒經千
霜而得拱仰百仞而方枝朝吐輕烟薄霧夜宿
迷鳥羈雌露雖滋而不潤風未動而先知託梢
雲於青漢亦倒影於華池輕陰蒙密喬柯布護
葉斷禽蹤枝通猿路聽騷騷於旣曉望隱隱於
將暮暖平湖而漾青綠拂增綺而籠丹素於時
風急壟首寒浮塞天流蓬不息明月孤懸檀欒
之竹可詠鄒枚之容存焉清都之念方遠姑射
之想悠然擢柔情於蕙國涌寶魚於珠泉豈徒
爲善之小樂離微之短篇若此而已乎

愍衰草賦

愍衰草衰草無容色憔悴荒徑中寒荻不可識
昔時兮春日昔日兮春風御華兮佩實垂綠兮
散紅巖陬兮海岸水多兮霰積布綿密於寒臯
纖䟽於危石彫芳卉於九衢霄靈茅之三脊
風急峭道難秋至客衣單既惕簷下菊復悲池
上蘭飄落逐風盡方知歲早寒流螢暗明燭鴈
聲斷裁續霜奪莖上紫風銷葉中綠秋鴻兮䟽
引寒鳥兮聚飛徑荒寒草合草長荒徑微園庭
漸荒沒霜露日沾衣

麗人賦

有客弱冠未仕締交戚里馳騫王室遨遊許史
歸而稱曰狹斜才女銅街麗人亭亭似月嫵婉
如春凝情待價思尚衣巾芳踰散麝色茂開蓮
陸離羽瑁雜錯花鈿響羅而不進隱明燈而未
前中步澹而一息順長廊而迥歸池翻荷而納
影風動竹而吹衣薄暮延佇宵分乃主出闈入
光含羞隱媚垂羅曳錦鳴瑤動翠來脫薄粧去
留餘膩霑粧委露理鬢清渠落花入領微風動
裾

樂府雅樂歌

皇雅

帝德實廣運車書靡不賓執瑁朝群后垂旒御
百神八荒重譯至萬國婉來親
華蓋拂紫微勾陳繞太一容裔被緹組參差羅
罕畢星回照以爛天行徐且謚
清蹕朝萬寓端冕臨正陽青約黃金纒袞衣文
綉裳既散華蟲采復流日月光

滌雅

將修盛禮其儀孔熾有膺斯牲國門是置不黎

不痼靡愆靡忌呈肌獻體永言昭事俯休皇德
仰綏靈志百福具膺嘉祥允洎駿奔伊在慶覃
遐嗣

牲雅

反本與敬復古昭誠禮容宿設祀事孔明華俎
待獻崇卑麗牲充哉爾握肅矣簪纓其膺既啓
我豆既盈庖丁游刃曷盧驗聲多祉攸集景福
來并

誠雅

懷忽慌瞻浩蕩盡誠潔致虔想出杳冥隆無象

皇情肅具僚仰人禮盛神途啟俊明靈伸敬享
感蒼極動玄象

地德溥昆丘峻揚羽翟鼓應陳出尊祗展誠信
招海若羅嶽鎮惟福祉咸昭晉
我有明德馨非稷黍牲玉孔備嘉薦惟旅金懸
宿設和樂具舉禮達幽明敬行樽俎鐘鼓云送
邀福是與

獻雅

神宮肅肅天儀穆穆禮獻既同膺茲釐福我有
馨明無愧史祝

禋雅

紫宮昭煥太一微玄降臨下土尊高上天載陳
珪幣式備牲牲雲孤清引栴虞高懸俯昭象物
仰致高煙肅彼雲祉咸達皇虔

盛樂斯舉協徵調宮靈響慶洽祉積化融八變
有序三獻已終坎牲瘞玉酬德報功振垂成呂
投壤生風道無虛致事由感通於皇盛烈比祚
華嵩

南郊登歌二首

噉既明禮告成惟聖祖主上靈爵已獻壘又盈

息羽籥展歌聲優如在結皇情
禮容盛樽俎列玄酒陳陶匏設獻清酒致虔潔
玉既升樂已闋降蒼昊垂芳烈

北郊登歌二首

方壇既埴地祇已出盛典弗讐群望咸秩乃升
乃獻敬成禮卒靈承無兆神饗載謐允矣嘉祚
其升如日

至哉坤元實惟厚載躬茲奠饗誠文顯晦或升
或降搖珠動珮德表成物慶流皇代純嘏不讐
祺福是贄

明堂登歌五首

青帝出帝居在震龍德司春開元布澤含和尚
仁羣居既散歲云陽止飭農分地民粒惟始雕
梁繡拱丹楹玉墀靈威已降百福來綏

赤帝炎光在離火爲威德執禮昭訓持衡受
則靡草既凋溫風以至嘉薦惟旅時羞孔備齊
緹在堂笙鏞在下匪惟七百無絕終始

黃帝鬱彼中壇含靈闡化迴環氣象輪無輟
駕布德焉在四序將收音宮數五飯稷駉駉宅
屏居中旁臨外宇升爲帝尊降爲神主

白帝神在秋方帝居西皓允茲金德裁成萬
寶鴻來雀化參見火斜幕無玄鳥菊有黃華載
列笙磬式陳彝俎靈罔常懷惟德是與
黑帝德盛乎水玄冥紀節陰降陽騰氣疑象
闕司智莅坎駕鐵衣玄祁寒拆地晷度迴天悠
悠四海駿奔奉職祚我無彊永隆民極
宗廟登歌七首
功高禮洽德尊樂備三獻具舉百司在位誠敬
罔讐幽明同致茫茫億兆無思不遂蓋之如天
容之如地

殷兆王筐周始邠王於赫文祖基我大梁肇土
七十奄有四方帝軒百祀人思未忘永言聖烈
祚我無彊

有夏多罪般人塗炭四海倒懸十室思亂自天
命我殲凶殄難旣躍乃飛言登天漢爰享爰格
福祿攸贊

犧象既飾壘俎斯具我鬱載馨黃流乃注我我
卿士駿奔是務珮上鳴堦纓還拂樹悠悠億兆
綏臨日煦

猗歟至德光被黔首鑄鎔蒼昊甄陶區有恪恭

三獻對揚萬壽比屋可封含生無咎匪徒七百
天長地久

有命自天於皇后帝悠悠四海莫不來祭繁祉
具膺八神聳衛福至有兆慶來無際播此餘休
于彼荒裔

祀典昭潔我禮莫違八簋充室六龍解駢神宮
肅肅靈寢微微嘉薦既饗景福攸歸至德光被
洪祚載輝

三朝雅樂歌

俊雅三首

設官分職髦俊攸俟髦俊伊何貴德尚齒唐又
咸事周寧多士區區衛國猶賴君子漢之得人
帝猷乃理

開我八襲闢我九重珩珮流嚮纓紱有容衮衣
前邁列辟雲從義兼東序事美西雍分階等肅
異列齊恭

重列北上分庭異陞百司揚職九賓相禮齊宋
舅甥魯衛兄弟思皇藹藹群龍濟濟我有嘉賓
實愷實悌

胤雅

自昔殷代哲王迭有降及周成惟噐是守上天
乃眷大梁既受灼灼重明仰承元首體乾作貳
命服斯九置保置師居前居後日星比耀克隆
萬壽

寅雅

禮莫違樂具舉延藩辟朝帝所執桓蒲列齊莒
垂衮毳紛容與升有儀咭有序齊簪綬忘笑語
始矜嚴終酣醕

介雅三首

百福四象初萬壽三元始拜獻惟衮職同心協

卿士北極永無窮南山何足擬
壽隨百里洽慶與三朝升惟皇集繁祉景福互
相仍申錫永無遺穰簡必來應
百味既含馨六飲莫能尚玉壘信湛湛金卮頗
搖漾敬舉發天和祥祉流嘉貺

需雅八首

食舉奏需雅取易象雲上於天需君子以飲食宴樂也

實體平心待和味庶羞百品多為貴或鼎或鼐
宣九沸楚桂胡鹽芼芳卉加籩列俎彫且蔚

又

五味九變兼六和令芳甘旨庶且多三危之露

九真禾圓按方丈祭星羅皇舉斯樂同山河

又

九州上腴非一族玄之碧樹壽華木終期采芝
不盈掬用拂臙腥和九穀既甘且飫致遐福

又

人欲所大味為先興和盡敬咸在旃碧鱗朱尾
獻嘉鮮紅毛綠翼墜輕翹臣拜稽首萬斯年

又

擊鐘以俟惟大國况乃御天流至德侑食斯舉
揚盛則其禮不讐儀不忒風猷所被深且塞

又

膳夫奉職獻芳滋不麝不天咸以時調甘適苦
別澠淄其德不爽受福釐於焉逸豫永無期

又

備味斯饗惟至聖咸降人神禮為盛或風或雅
流歌詠負鼎言歸啓殷命悠悠四海同茲慶

又

道我六穗羅八珍洪鼎自爨匪勞薪荆包海物
必來陳滑甘滫髓味和神以斯至德無垠

雍雅三首

明明在上其儀有序終事靡僇收劔撤俎乃升
乃降和樂備舉天德莫違人謀是與敬行禮達
茲馬讌語

載駿惟阜我肴孔庶嘉味既充食旨斯飫屬厭
無爽冲和在御擊壤齊歡懷生等豫烝庶乃粒
宴由仁恕

百司警列三皇在陛既飫且醕卒食成禮其容
穆穆其儀濟濟凡百庶寮莫不愷悌奄有萬國
抑由天啓

芳樹

發萼九華隈開跼寒露側氤氲非一香參差多
異色宿昔寒飈舉摧殘不可識霜雪交橫至對
之長歎息

有所思

西征登隴首東望不見家關樹抽紫葉塞草發
青芽昆明當欲滿葡萄應作花垂淚對漢使因
書寄狹斜

釣竿

桂舟既容與綠浦復回紆輕絲動弱芰微楫起
單鳧扣舷急日暮卒歲以爲娛

洛陽道

洛陽大道中佳麗實無比
燕裙傍日開趙帶隨風靡
領上葡萄綉腰中合歡綺
佳人殊未來薄雲空徙倚

五音曲

宮引

八音資始君五聲興比和樂感百精
優游律呂被咸英

商引

司秋犯爰奏西音激揚鐘石和瑟琴
風流福被

樂愔愔

角引

萌生觸發歲在春咸池始奏德尚仁
恣瀝以息和且均

徵引

執衡司事宅離方滔滔夏日火德昌
八音備舉樂無疆

羽引

玄英紀運冬冰折物為音本和且悅
窮高測深長無絕

江南曲

擢歌發江潭采蓮渡湘南莫須問隱處舟浦予
自諳羅衣織成帶墮馬碧玉簪但令舟楫渡寧
計路嶄嵌

日出東南隅行

朝日出邳鄆照我叢臺端中有傾城艷顧景織
羅紈延軀似纖約遺視若回瀾瑤莊映層綺金
服炫彫纈幸有同匡好西仕服秦官寶劔垂玉
具汗馬飾金鞍縈場類轉雪逸控似騰鸞羅衣
夕解帶玉釵暮垂冠

明君詞

朝發披香殿夕次汾陽河於茲懷九折自此歛
雙蛾沾粧疑湛露繞臆狀流波日見奔沙起稍
覺轉蓬多胡風犯肌骨非直傷綺羅銜涕拭南
望關山鬱嵯峨始作陽春曲終成苦寒歌唯有
三五夜明月暫經過

長歌行

連連舟壑改微微市朝變來切嗣往迹莫武徂
升彥局塗頓遠策留歡限奔箭拊戚狀驚瀾循
休擬回電歲去芳願違年來苦心薦春貌既移

紅秋林豈停舊一倍茂陵道寧忘栢梁宴長戟
兔園情永別金華殿聲微無惑簡丹青有餘絢
幽篔且調無使長歌倦

君子行

良御或燕楚妙察亂澠淄隄傾由漏壤垣隙自
危基囂途或妄踐黨議勿輕持

豫章行

燕陵乎而遠易河清且駛一見塵波阻臨途引
征雙劍愛恒同孤鸞悲影異宴言誠易纂清歌
信難嗣卧聞夕鐘急坐閱朝暉亟往歡墜壯心

來戚滿衰志殂芳無再馥淪灰定還熾夏臺尚
可忘榮辱亦奚事愧微曠士節徒感鄙主餌勞
哉納辰和地遠託聲寄

相逢狹路間

相逢洛陽道繫聲流水車踞逢輕薄子竚立門
君家君家誠易知易知復易憶龍馬滿街衢飛
蓋交門側大子萬戶侯中子飛而食小子始從
官朝夕温省直三子俱入門赫奕多羽翼若若
青組紆煙煙金璫色大婦繞梁歌中婦回文織
小婦獨無事閉戶聊且即綠綺試一彈玄鶴方

鼓翼

長安有狹斜行

青槐金陵陌丹轂貴遊士方驟萬乘臣炫服千
金子咸陽不足稱臨淄孰能擬

三婦豔

大婦掃玉匣中婦結珠帷小婦獨無事對鏡理
蛾眉良人且安臥夜長方自私

江離生幽者又云塘上行

澤蘭被荒徑孤芳豈自通幸逢瑤池曠得與金
芝叢朝承紫臺露夕潤綠池風既美脩嫿女復

悅繁華童夙昔玉霜滿且暮翠條空葉飄儲胥
右芳歇露寒東紀化尚盈吳俗志信頽隆財殫
交易絕華落愛難終所惜改驩盼豈恨逐征蓬
願回昭陽景時照長門宮

却出東西門行

驅馬城西阿遙眺望京闕望極煙原盡地遠山
河沒搖裝非短晨還歌豈明發脩服悵邊羈瞻
途眇鄉謁馳蓋轉徂龍回星引奔月樂去哀鏡
滿悲來壯心歇歲華委徂貌年霜移暝髮辰物
又侵晏征思坐淪越清氛掩行夢憂原盪瀛渤

一念起關山千里顧丘窟

飲馬長城窟

介馬渡龍堆塗縈馬屢迴前訪昌海驛雜種寇
輪臺旌幙卷煙雨徒御犯冰埃

青青河畔草

漠漠牀上塵心中憶故人故人不可憶中夜長
嘆息嘆息想容儀不言長別離別離稍已久空
床寄杯酒

梁甫吟

龍駕有馳策日御不停陰星籥亟回變氣化坐

盈侵寒光稍眇眇秋塞日沉沉高窓灰餘火傾
河駕騰參飈風折暮草鶻竿實層林時雨霽空
遠淵水結清深奔驅豈易糝庭不可臨懷仁每
多意履順孰能禁露清一唯促緩志且移心哀
歌步梁甫歎絕有遺音

東武吟行

天德深且曠人世賤而浮東枝纔拂景西壑已
停輶逝辭金門寵去飲玉池流霄轡一永矣俗
累從此休

怨歌行

時屯寧易犯俗險信難群坎壈元淑賦頓挫敬
通文遽論班姬寵夙窆賈生墳短俗同如此長
歎何足云

襄陽蹋銅蹄

分手桃林岸望別峴山頭若欲寄音信漢水向
東流生死宛上冰從軍襄陽城一朝遇神武奮
翼起先鳴蹠控飛塵起左右自生光男兒得富
貴何必在歸鄉

江南弄四首

趙瑟曲

邯鄲竒弄出文梓繁絃急調切流徵玄鶴徘徊
白雲起白雲起鬱披香離復合曲未央

秦箏曲

羅袖飄飄拂雕桐促柱高張散輕宮迎歌度舞
遏歸風遏歸風止流月壽萬春歡無歇

陽春曲

楊柳垂地燕差池緘情忍思落容儀絃傷曲怨
心自知心自知人不見動羅裙拂珠殿

朝雲曲

陽臺氤氳多異色巫山高高上無極雲來雲去

常不息常不息夢來遊極萬世度千秋

大壯舞歌

高高在上實愛斯人眷求聖德大極彝倫率土
方燎如火在薪慄慄黔首暮不及晨朱光啓耀
北發穹旻我皇鬱起龍躍漢津言局牧野電激
雷震闕鞏之甲彭濮之人或貌或武浮杵浮輪
我邦雖舊其命維新六伐乃止七德必陳君臨
萬國遂撫八寅

大觀舞歌

皇矣帝烈大哉興聖奄有四方受天明命居上

不怠臨下惟敬舉無僇則動無失正物從其本
人遂其性昭播九功肅齊八柄寬以惠下德以
爲政三趾晨儀重輪夕映棧壑忘阻梯山匪負
如日有恒與天無竟載陳金石式流舞詠咸英
韶夏於茲比盛

臨碣石

碣石送返潮登岸禮朝日溟漲無端倪山島玄
崇嶧驥老心未窮酬恩豈終畢

四時白苧歌奉

敕撰後四句俱武帝續

春白苧

蘭葉參差桃半紅
飛芳舞縠戲春風
如驕如怨狀不同
含笑流盼滿堂中
翡翠群飛飛不息
願在雲間長比翼
佩服瑤草駐容色
舜日堯年歡無極

夏白苧

朱光灼爍照佳人
含情送意遙相親
嫣然宛轉亂心神
非子之故欲誰因
翡翠群飛飛不息
願在雲間長比翼
佩服瑤草駐容色
舜日堯年歡無極

秋白苧

白露欲凝草已黃
金瑄玉柱響洞房
雙心一意俱徊翔
吐情寄君君莫忘
翡翠群飛飛不息
願在雲間長比翼
佩服瑤草駐容色
舜日堯年歡無極

冬白苧

秦箏齊瑟燕趙女
一朝得意心相許
明月如窺方襲予
夜長未央歌白苧
翡翠群飛飛不息
願在雲間長比翼
佩服瑤草駐容色
舜日堯年歡無極

湘夫人

瀟湘風已息沅澧復安流揚蛾一含睇嬈娟好
且脩捐玦置澧浦解珮寄中州

貞女引

貞心信無矯傍鄰也見疑輕生本非惜賤軀良
足悲傳芳託嘉樹絃歌寄好詞

君子有所思行

晨策終南首顧望咸陽川戚里遡曾闕甲館負
崇軒複塗希紫閣重臺擬望仙巴姬幽蘭奏鄭
女陽春絃共矜紅顏日俱忘白髮年寂寞茂陵
宅照曜未央蟬無以五鼎盛顧嗤一徑玄

悲哉行

旅遊媚年春年春媚遊人徐光旦垂彩如露曉
凝津時嚶起雅葉蕙氣動初蘋一朝阻舊國萬
里隔良辰

白馬篇

白馬紫金鞍停鑣過上蘭寄言狹斜子詎知隴
道難赤坂途三折龍堆路九盤冰生肌裏冷風
起骨中寒功名志所急日暮不遑飡長驅入右
地輕舉出樓蘭直去已垂涕寧可望長安匪期
定遠封無羨輕車官唯見恩義重豈覺衣裳單

本持軀命答幸遇身名完

齊謳行

東秦稱右地川隰固夷祖層峰駕蒼雲濁河流
素壤青丘良杏鬱雪宮信踈敞王佐改殷命霸
功繆周網

緩聲歌

羽人廣宵宴帳集瑤池東開霞泛彩靄澄霧迎
香風龍駕出黃苑帝服起河宮九疑轡煙雨三
山馭螭鴻玉鑿乃排月瑤較信凌空神行燭玄
漢帝飭委會虹簫歌 羸女笙吹悅姬童璫漿

且未洽羽轡已騰空息鳳曾城曲滅景清都中
降祐集皇伐委祚溢華嵩

樂未央

億舜日萬堯年詠湛露歌採蓮願雜百和氣宛
轉金鑪前

永明樂

聯翩貴遊子侈靡千金客華轂起飛塵珠履竟
長陌

携手曲

捨轡下雕輅更衣奉玉牀聯簪映秋月開鏡比

春粧所畏紅顏促君恩不可長鳩冠且容齋豈
吝桂枝亡

夜夜曲

北斗闌干去夜夜心獨傷月輝橫射枕燈光半
隱床河漢縱復橫北斗橫復直星漢空如此寧
知心有憶孤燈暖不明寒機曉猶織零淚向誰
道鷄鳴徒嘆息

從軍行

惜哉征夫子憂恨良獨多浮天自鯁海東馬渡
交河雪縈九折嶝風卷萬里波維舟無夕島秣

驥乏平沙凌濤富驚沫援木闕垂蘿江颶鳴壘
輿流雲照層阿玄埃晦朔馬白日照吳戈寢興
動征怨寤寐起還歌晨裝豈輟警夕壘詎淹和
苦哉遠征人悲矣將如何

臨高臺

高臺不可望遠望使人愁連山無斷絕河水復
悠悠所思竟何在洛陽南陌頭可望不可見何
用解人憂

白銅鞮歌三首

生長宛水上往宦襄陽城一朝遇神武奮翼起

先鳴

蹄控飛塵起左右自生光男兒得富貴何必還
故鄉

分首桃林岸望別峴山頭若欲寄書信漢水向
東流

月

月華臨靜夜夜靜滅氛埃方暉竟入戶圓影隙
中來高樓切思婦西園遊上才網軒映珠綴應
門照綠苔洞房殊未曉清光信悠哉

詠月篇

望秋月秋月光如練照耀三爵堂徘徊九華殿
九華玳瑁梁華懷與璧璫以茲雕麗色持照明
月光凝華入黼帳清輝懸洞房先過飛燕戶却
映班姬牀桂宮裊裊落桂枝早寒淒淒凝白露
上林曉葉颯颯鳴鴈門早鴻離離度湛秀質兮
似規委清光兮如素照愁軒之蓬髮影金階之
輕步居人臨此笑以歌別客對之傷且慕經衰
圃映寒叢凝清夜帶秋風隨庭雪以借素與池
荷而共紅臨玉墀之皎皎含露靄之濛濛輔天
衢而從度轆長漢而飛空隱崑崖之半出隔幃

幌而纔通散朱庭之奕奕入青瑣而玲瓏寒階
悲寡鵠沙洲怨別鴻昭姬乞胡殿明君思漢宮
余亦何為者淹留此山東

風

樓上試朝粧風花下砌旁入鏡光飄粉翻衫好
染香逐舞飛長袖傳歌共逸梁欲因吹少女還
將拂大玉

又

臨春風春風起春樹暖絲暗如網落花紛似霧
先泛天淵池還過細柳枝蝶逢飛搖漾燕值羽

差池揚桂旆動芝蓋開燕裙吹趙帶趙帶飛參
差燕裙合且離回看復轉黛領步惜容儀容儀
已照灼春風復回薄氛氲桃李花青跗含素萼
既為風所開復為風所落搖綠帶玩紫莖舞春
雪雜流鶯曲房開兮金鋪響金鋪響兮思鳳鳴
梧臺未陰淇水始碧迎行雨於高臺送歸鴻於
碣石經洞房響紈素感幽閨思帷帟想西園可
以遊念蘭麝已堪摘拂明鏡之冬塵解羅衣之
秋襲既鏗鏘以動珮又氤氳而流射始搖蕩以
入閨終徘徊而緣隙鳴珠簾於綉戶散芳塵於

綺席。是時悵思婦。春風與誰惜。佳人不在茲。春風為誰惜。

和王中書德元詠白雲

白雲自帝鄉。氛氲屢回沒。蔽虧崑山樹。含吐瑤臺月。秋風西北起。飄我過城闕。城闕已參差。白雲復離離。皎潔在天漢。倒影入華池。將過丹丘野。時至碧林垂。九重迎飛燕。萬里送翔螭。

春初

扶道覓陽春。相將共携手。草色猶自非。林中都未有。無事逐梅花。空教信楊柳。且復歸去來。含

情寄杯酒

詠春

楊柳亂如絲。綺羅不自持。春草復黃綠。客心悲此時。青苔已結洧。碧水復盈淇。日華照趙瑟。風色動燕姬。襟中萬行淚。故是一相思。

傷春

弱草半抽黃。輕條未全綠。年芳被禁籞。烟花繞曾曲。寒苔卷復舒。冬泉斷方續。早花散疑金。初露泫成玉。

上巳率爾成篇

麗日屬元巳年芳俱在斯
開花已匝樹流鶯復
消枝洛陽繁華子長安
輕薄兒東出千金堰西
臨鴈鷺陂游絲應空轉
高柳拂池垂綠萍文照
耀紫燕光陸離清晨戲
伊水薄暝宿蘭池象筵
鳴寶瑟金瓶泛玉卮
仍憶蚕眠起日暮桑欲
萎長袂屢已拂雕胡方
自炊愛而不可見宿昔
減容儀早當忘情事嘆
息獨何爲

秋夜

月落宵向分紫烟鬱氛
氲暄暄螢入霧離離鴈
出雲已童暗理瑟漢女
夜縫裙新知樂如是久

要詎相聞

織女贈牽牛

紅粉與明鏡二物本相親
用持施點畫不照離
居人往秋雖一點一照還
復塵生不復拂蓬
首對河津冬夜寒如此
寧遽首陽春初商忽云
至暫得奉衣巾施子已
成故忽耻輒如新

遊鍾山

靈山標地德地險資岳靈
終南表秦館少室邇
王城翠鳳翔淮海衿帶繞
神垆比阜何其峻林
薄杳蕊青發地多竒嶺千
雲非一狀合沓共隱

天參差分相望鬱律構丹巘峻嶒起青嶂勢隨
九疑高氣與三川壯即事旣多美臨眺殊復竒
南矚儲胥觀西望昆明池山中咸可悅賞逐四
時移春光發隴首秋風生桂枝多值息心侶結
架山之足八解鳴澗流四禪隱巘曲窈冥終不
見蕭條無可欲所願從之遊寸心於此足君王
擬逸趣羽旆臨崇基白雲隨玉趾青霞雜挂旗
淹留訪五藥顧步佇三芝於焉仰鑣駕歲暮以
爲期

遊金華山

遠策追風心靈山協久要天倪臨紫闕道地通
丹徼未乘琴高鯉且從嚴陵釣若蒙羽駕迎得
奉金 召高馳入閭闔方覩靈妃笑

守山東

守山東山東萬籟鬱青葱兩谿共一瀉水潔望
如空岸側青莎被巖間丹桂叢上瞻旣隱軫下
睇亦溟濛遠林響咆獸近樹聒鳴蟲路出若溪
右澗吐金華東萬仞倒危石百丈注懸淙掣曳
寫流電奔飛似白虹洞井含清氣漏穴吐飛風
玉竇膏滴瀝石乳室空籠峭煇塗彌險豈咀步

繞通余平生之所愛歛暮年之此逢欲一去而
不還悵鄒衣之未褫挹林壑之清曠事民俗之
紛詭幸帝力之方升值天網之未毀旣除舊而
就新故化民而俗徙播趙俗以西徂扇齊風以
東靡乳雉方可馴流蝗庶能弭清心矯世濁儉
政救民侈秩滿撫白雲淹留事芝髓

劉真人東山還

連峰竟無已積翠遠微微寥戾野風急芸黃秋
草腓我來歲云暮於此悵懷歸霜雪方共下寧
唯沾露衣待余兩岐成去去揜柴扉

泛永康江

長枝萌紫葉清源泛綠苔山光暎水至春色犯
寒來臨睨信永矣望美暖悠哉寄言幽閨夢羅
袖勿空裁

渡新安江貽京邑游好

眷言訪舟客茲川信可珍洞徹隨流淺皎鏡無
冬春千仞寫高樹百丈見遊鱗滄波有時濁清
濟涸無津豈若棄斯去俯映石磷磷紛吾隔躑
躑寧可濯衣巾願以潺湲水霑君纓上塵

侍宴謝朓宅東歸應制

皇情悵東甍羽旆拂南廡夏雲清朝景秋風揚
早蟬飲和陪下席論道光上筵

侍宴樂遊苑餞呂參軫應詔

丹浦非樂戰負重切君臨我皇蘊至德恭已用
堯心愍茲區宇內魚鳥失飛沉推轂三嶠道揚
旆九河陰超乘盡三屬選士皆百金戎車出細
柳鉞席導上林興師誅後服授律緩前禽函轅
方解帶驍武已披襟伐罪芒山曲弔民伊水潏
將陪告成禮待此未抽簪

侍遊方山應制

清漢夜昭哲扶桑曉陸離發吹重陽下建羽朝
夕池撻金浮水若聳蹕詔山祗一灑九霄露藜
藿終自知

三日侍林光殿曲水宴應制

宴鎬鏘玉鑿遊汾舉仙軼榮光泛彩旄脩風動
芝蓋淑氣婉登晨天行聳雲旆帳殿臨春禦帷
宮繞芬蒼漸席周羽觴分墀引迴瀨穆穆玄化
升濟濟皇階泰將御遺風軫遠侍瑤臺會

庭雨應詔

出空寧可圍入庭倍難賦非烟復非雲如絲復

如霧霽霖裁欲垂霏微不能注雖無千金質聊
爲一辰趣

詠箏

秦箏吐絕調玉柱揚清曲絃依高張斷聲隨妙
指續徒聞音繞梁寧知顏如玉

又

彼美實孤枝孤篠定參差鷓鴣已嘲哲棗下復
淋漓本期王子晉寧待洛嬪吹

遊仙

朝止閶闔宮高宴清都闕勝蓋隱奔星低鑿避

行月九疑紛相從虹旌乍升沒青鳥去復還高
唐雲不歇若華有餘照淹留且晞髮

酬孔通直過懷蓬居

閶闔既洞啓龍樓亦高闕兩宮集鸞步二闕引
通籍伊邇事清途紛吾供賤役

酬謝宣城眺

王喬飛鳧舄東方金馬門從宦非宦侶避世非
避諠揆余發皇鑿短翮屢飛翻晨趨朝建禮晚
沐卧郊園賓至下塵榻憂來命綠尊昔賢侔時
雨今守馥蘭孫被交疲夢寐路遠隔思存牽拙

謬東汜浮情反西岷顧循良菲薄何以儼璵璠
將隨渤澥去刷羽汎清源

送別友人

君東我亦西街悲涕如霰浮雲一南北何由屢
言宴方作異鄉人贈子同心扇遙裔發海鴻連
翩出簷燕春秋更去來參差不相見

別范安成

平生少年比分手易前期及爾同衰暮非復別
離時勿言一樽酒明日難共持夢中不識路何
以慰相思

別謝文學

漢池水如帶巫山雲似蓋一望沮漳水寧思江
海會以我徑肯心從君千里外

從齊武帝瑯琊城講武應詔

九功播祧埴七德陳舞懸展事昌國圖息兵由
重戰皇情咨閱典出軍追辰選飾徒映寒隰翻
綏臨廣甸颯沓佩吳戈參差腰夏箭風旆舒復
卷雲霞清似轉輕舞信徘徊前歌且遙衍秋原
嘶代馬朱光浮楚練虹壑寫飛文巖阿藻餘絢
發震岳靈從揚旌水華變憑高訓武則中天起

遐眷鳳蓋掩洪河珠旗掃長汜方待翠華舉遠
適瑤池宴

傷王融

元長秉奇調弱冠慕前蹤眷言懷祖武一篲望
成峯塗艱行易跌命舛志難逢折風落迅羽流
恨滿青松

傷謝朓

吏部信才傑文鋒振奇響調與金石諧思逐風
雲上豈言凌霜質忽隨人事徃尺璧爾何寃一
日同丘壤

傷庾杲之

右率復時譽秀出冠朋僚聳茲千仞氣振此百
尋條蘊藉含文雅散朗溢風颯楸櫟今已合容
範尚昭昭

傷王謀

長史體閒任坦蕩無外求持身非詭遇應物有
虛舟心從期好畫形為歡宴留歡宴未終畢零
落委山丘

傷虞炎

東南既擅美洛陽復稱才携手同懽宴比跡共

遊陪事隨短秀落言歸長夜臺

傷李珪之

少府懷貞節忘軀欣所奉吏道勤不息繁文長
自擁旣闕優孟歌身沒誰爲寵

傷韋景猷

韋叟識前載博物備戎華稅驂止營校淪跡委
泥沙始知庸聽局方誤大音賒

傷劉颯

處和無近累天然有勝質蕭瑟負高情耿介懷
秋實義貴良爲重蘭摧非所恤一罷平生言寧

知携手日

傷胡諧之

豫州懷風範綽然操雅度處約志不渝接廣情
無忤頽頽事刀筆汾淪逋朱素美志同山浮何
年迫朝露

悼亡

去秋三五月今秋還照梁今春蘭蕙艸來春復
吐芳悲哉人道異一謝永銷亡簾屏既毀撤帷
席更施張遊塵掩扉座孤帳覆空牀萬事無不
蓋徒令存者傷

又登玄暢樓

危峰帶北阜高頂出南岑中有風陵榭迴望川
之陰岸險每增減湍平互淺深水流本三派臺
高乃四臨上有離群客客有暮歸心落暉映長
浦煥景燭中潯雲生嶺乍黑日下溪半陰信美
非吾土何事不抽簪

麥李

青玉冠西海碧石彌外區化為中園實其下成
路衢在先良足貴因小邈難逾色澗房陵縹味
奪寒永朱摘持欲以獻尚食且踟躕

園橘

綠葉迎露滋米苞待霜潤但令入玉盤金衣非
所恡

應詔詠梨

大谷來旣重岷山道又難摧折非所恡但令入
玉盤

答元金紫餉朱李

穠花春發彩結實下成蹊潘生咏金谷魏后沉
寒溪逢君重妖麗移翫入崇閨慙無瓊玖報徒
用萃幽棲

詠青苔

綠苔已漠漠。汎水復綿綿。微根如欲斷。輕絲似更聯。長風隱細草。深堂沒綺錢。繁鬱無人贈。葳蕤徒可憐。

和竟陵王遊仙詩

天矯乘絳仙。螭衣方陸離。玉鑿隱雲霧。溶溶紛上馳。瑤臺風不息。赤水正漣漪。崢嶸玄圃上。聊攀璫樹枝。

去東陽與吏民別

微薄叨今幸。忝荷非昔期。唐風豈異世。欲民重

在茲飾驂去。關輔分竹入。河淇下車如。昨日曳組忽。彌菁霜載凋。秋草風動春旗。

餘雪

陰庭覆素芷。南階褰綠施。玉臺新落構。青山已半虧。

奉和竟陵王

用郡縣名

西都富軒冕。南宮溢才彥。高闕連朱雉。方渠漸游殿。廣川肆河濟。長岑繞崑崙。并曲梁濟危。渚平臯騁悠。眇青淵皎澄。徹曾山鬱葱。藉陽泉濯春藻。陰丘聚寒霰。西華不可留。東光促奔箭。望都

游子懷臨戎征馬倦既豫平臺集復齒南皮宴
一窺長安城羞言杜陵掾

又 用藥名

丹草秀朱翹重架臺危岵水蘭路易飲射干枝
可結陽隰採辛夷寒山望積雪玉泉亟周流雲
華乍明滅合歡葉暮卷爵林穀夜切垂景迫連
桑思仙慕雲埒荆實部丹瓶龍荔汗奔血照幄
乃夜光盈車非玉屑細柳空葳蕤水萍終委絕
黃符若可挹長生未昭哲

和陸慧曉 用百姓名

建都望淮海樹闕表衡稽井幹風雲出栢梁星
漢齊皇王臨萬宇惠化覃黔黎吉士服仁義宿
昔秉華圭庸賢起幽谷欽言非象犀端委康國
步偃昔召邦携舉政方分策易紀粲金泥伊余
沐嘉幸由是別園畦曾微涓露谷光景逐雲西
方隨鍊丹子薄暮矯行迷

正陽堂宴勞凱旋

覲入同高宴飲至勻多祜昔往歌采微今來歡
杖杜善戰惟我皇勝之不窺戶推轂受神謨餘
壯終能賈浩蕩金罍溢周流玉觴傳

出重圍和傳詔

魯連揚一策陳平出六奇邯鄲風雨散白登煙霧維排雲出九地陵定振五卮

宿東園

陳王鬪雞道安仁采樵路東郊豈異昔聊可閒
余步野徑既盤紆荒阡亦交互槿籬踈復密荆
扉新且故對頂鳴風颭草根積霜露礪磨去不
息征鳥時返顧茅棟嘯愁鴟平岡走寒兔夕陰
帶層阜長烟引輕素飛光忽我適豈止歲云暮
若蒙西山藥頽齡倘能度

行園

寒瓜方臥壘秋菰亦滿陂紫茄紛爛熳綠芋鬱
參差初菘向堪把時韭日離離

餞文學離夜

漢池水如帶巫山雲似蓋澗汨皆吳潮潺湲橫
楚瀨一望阻漳水寧思江海會以我徑寸心從
君千里外

簾

江南簫管地妙嚮發孫枝殷勤寄玉指含情舉
復垂雕梁再三繞輕塵四五移曲中有深意丹

心君詎知

四城門

六龍既驚軫二鼠復馳光衰齡難慎輔曠質易凋傷

和王衛軍解講

妙輪輟往駕寶樹未開音甘露爲誰演得二標道心眇眇玄塗濶高議總成林七苑屏塵相八解濯芳襟

華山館爲國家營功德

沐芳禱靈岳稽首恭上玄帝昔祈萬壽臣今請

億年丹方緘洞府河清時一傳錦書飛雲字玉簡黃金篇

陶先生登樓不復下

側聞上士說尺木乃騰霄雲駢不展地仙居多麗譙臥得三芝秀坐對百神朝啣書必青鳥嘉客信龍鑣非止靈桃實方見大椿凋

赤松澗

松子排煙去英靈眇難測惟有清澗流潺湲終不息神丹在茲化雲駢於此陟願受金液方片言生羽翼渴就華池飲飢向朝霞食何時當來

還延佇青巘側

清旦發玄洲

清旦發玄洲日暮宿丹丘崑山西北映遊泉東
南流霓裳拂流殿雲車委輕霰崢嶸上不睹寥
廓下無見

沈道士館

秦王御宇宙漢帝恢武功歡娛人世盡情性猶
未克銳意三山上託慕九霄中既表祈年觀復
立望仙宮寧爲心好道直由意無窮曰余知止
足是願不須豐遇可淹留處便欲息微躬山嶂

逐重疊竹樹近蒙籠開襟濯寒水解帶臨清風
所累非物外爲念在玄踪朋來挹石髓賓至駕
飛鴻都令人徑絕惟使雲路通一舉陵倒景無
事適華嵩寄言賞真心客歲曠爾來同

三日侍鳳光殿曲水宴應制

光遲蕙畝氣婉椒臺皇心愛矣帝曰遊哉玉鸞
徐鶩翠鳳輕迴別殿廣臨離宮洞啓川祗奉壽
河宗相禮清洛漸筵長伊流陞泗盪嘉羞搖漾
芳醴輕歌易遠弱舞難持素雲留管玄鶴停絲
引思爲歲歲亦陽止叨服賁身身亦昌止徒勤

丹漆終愧文梓

為臨川王九日侍太子宴

涼風北起高鴈南翻葉浮楚水艸折梁園淒清
霜野惆悵晨鷗雲輕寒對日麗秋暎三金廣設
六羽高陳寒英始獻涼酎初醇靡靡神袷鏘鏘
群彥思媚儲猷洽和奉宴恩暢蘭席歡同桂殿
景遽樂推臨風以眷麗景天枝位非德舉任伍
辰階祚均河楚負岳未勝瞻雲難侶望古興惕
心焉載佇

九日侍宴樂遊苑

憑玉宅海端宸御天止流飛壑靜震騰川凝神

賁極擣道漏泉西裘

一作服

委衽南風在絃暮芝

始綠年桂初丹上林葉下滄池水寒霜霑玉樹

鴈動輕瀾停蹕玉陛徙衛璇墀瑀箱鳳綵羽蓋

鸞姿虹旌迢遞翠華歲蕤禮弘灞汭義高洛湄

翫庭柳

輕陰拂建章夾道連未央因風結復解沾露柔
且長楚妃思欲絕班女泪成行留人未應去為
此還故鄉

簷前竹

萌開籜已垂結葉始成枝
鱗蔭上鬱鬱促節下
離離風動露滴瀝月照影參差
得生君尸牖不願夾華池

湖中鴈

白水滿春塘旅雁每迴翔
唼汙牽弱藻歛翮帶
餘霜群浮動輕浪單汎逐孤光
懸飛竟不下亂起未成行
刷羽同搖漾一舉還故鄉

侍宴詠反舌

假容不足觀遺音猶可薦
幸蒙喬樹恩得以聞
高駈

應令大言

隘此大汎庭方知九陔局
窮天豈彌指畫天不容足

應令細言

蕭丞相弟詣世子車中

廉公失權勢門館有虛盈
貴賤猶如此况乃曲池平
高車塵未滅珠履故餘聲
賓階綠苔滿客位紫莓生
唯當九原上鬱鬱望佳城

蕭子範入元襄王第

伏軾窺東苑收淚下玉橋昔時方轂處于今共
寂寞夾池猶裊裊仙榭尚迢迢一同西靡栢徒
思芳樹蕭

聽蟬鳴應詔

輕生宅園籞復得捷嘉樹豈敢擅洪枝輕條遭
所寓葉密形易揚風回響難住

經劉瓛墓

表間欽逸軌式墓禮貞魂化塗終眇默神理曖
猶存塵經未輟幌高衡已委門華陰無遺布楚

席有靈樽

侍皇太子釋奠宴

復禮曲臺反樂宣榭闕文內舉輜軒外駕結朋
千里從師百舍隊典必從闕祀咸薦迴鸞獻爵
揆金委奠肆士辨儀胥人掌縣髣髴神蹤徘徊
靈睞

為南郡王侍太子釋奠宴

陵季相公訓隨世始政缺雅乖風離化改禮亡
衽席樂沉河海一雍靡搆四教誰采贍震並峻
義屬重麗橫書清道晦生知

梁沈約集終

何水部集

行經孫氏陵

昔在零陵厭神器若無依逐兔爭先捷倚鹿競
因機呼噏開伯道叱咤掩江畿豹變分竒畧虎
視爾戎威長虵蚺巴漢驥馬絕淮淝交戰無內
禦重門豈外扉成功舉已棄凶德悞而違水龍
忽東驚青蓋乃西歸竭來已永久年代曖微微
苔石疑文字荆墳失是非山鶯空曙響隴月自
秋輝銀海終無浪金鳧會不飛閨寂今如此望
望沾人衣

聖人登石頭城

關城乃形勢地險差非一馬嶺逐紆回犬牙傍
隆宰百雉極襟帶億度兼量出至理歸無爲善
守竟何恤眺聽窮耳目遠近備幽悉擾擾見行
人輝輝視落日連櫓入迴浦飛蓋交長術天暮
遠山青潮去遙沙出薄宦恧師表屬辭慙愈疾
願乘轂棘牛還隱蒙龍室

九日侍宴

皇德無餘讓重規入帝勛垂衣封比屋睠顧慎
爲君翺飛悅有道卉木荷平分宸襟動時豫歲

序屬涼氛城霞旦晃朗槐靄眺綢緼鸞輿和六
龍鳳駕起千郡羽觴謹湛露佾舞奏承雲禁林
終宴晚華池物色曛踈樹翻高葉寒沍聚細紋
晴軒連瑞氣同惹御香芬日斜迢遞宇風起嗟
峨雲運偶參候服恩洽厠朝文於焉藉多幸歲
莫仰遊汾

哭吳興柳惲

南荆擅荆梓上國稱羽儀伊人以戴德李公傷
在期遠識內無愠深衷外有窺清文窮麗則弘
論盡高竒多能誠所貴小善聊復爲百步均射

葉八體妙臨池曲悟同神解龜謀信有知入朝
耿長劍出牧盛層麾納言信加首豐貂亦在移
霞區兩借冠貪泉一舉卮翰飛矯未極朝露溘
先危以茲舊館想况乃西日垂蔓草生車轍枯
木卧崩坻樽酒誰爲滿靈衣空自披眷言尋惠
好慟哭悲路岐含毫徒有屬搦管竟無摛

贈族人秣陵兄弟

吾宗昔多士文雅高縉紳小子無學術丁寧困
負薪傍枝實紛亂領袖寄親姻名價齊兩許閨
門比三陳風力咸通邁藝業並紛綸元方振高

羽洛令初解巾自爾典名郡所在號清淳齊兒
敢爲俗蜀物豈隨身祿俸不妻子謳吟乃吏民
孰云穢明德惟在中聖人若能遺酌我稱首當
屬仁仲將本特達坎壈猶賤貧方成天下士豈
伊席上珍外情或簡易內鑒甚人倫時然臨下
邑摘伏信如神顧余晚脫畧懷抱日湮淪游宦
疲年事來往厭江濱十載猶先職一官乃任真
土牛竟不進芻狗空重陳羈旅無儔匹形影自
相親蕭索高秋暮砧杵鳴四隣霏霏入窗雨漠
漠暗床塵所思不可見邈若胡與秦願子加餐

飯良會在何辰

贈江長史別

二紀歷茲辰
投分敦遊處
况事兼年德
宴交無爾汝
中歲多乖違
由來難具叙
及君相藩牧
伊子客梁楚
出國乃參差
會歸同處所
以茲篤惠好
何用忘羈旅
重得申平生
何年更睽阻
籠禽恨跼促
逸翮超容與
餞道出郊垌
把袂臨洲渚
長飈落江樹
秋月照沙渚
遠送子應歸
棹開帆欲舉
離舟謹未極
別至悲無語
安得生羽毛
從君入宛許

落日前墟望贈范廣州雲

緣溝綠草蔓
扶掖襟華舒
輕烟澹柳色
重霞映日餘
遙遙長路遠
寂寂行人疎
我心懷碩德
思欲命輕車
高門盛遊侶
誰肯進畋魚

答何秀才

少年射策罷
擢第雲臺中
已輕淄水臺
復哭廣州翁
麟閣佇讐校
虎觀遲才通
方見雕篆合
誰與畋魚同
待爾金閨北
予藝青門東

胡興安夜別

居人行轉軾
客子暫維舟
自此一筵笑
分爲兩

地愁露濕寒塘草。月映清淮流。方抱新離恨。獨守故園秋。

行經范僕射故宅

旅葵應蔓井。荒藤已上扉。寂寂空郊暮。無復車馬歸。湫澀故池水。蒼茫落日輝。遺愛終何極。行路獨沾衣。

入東經諸暨縣下浙江作

疲身不自量。溫腹無恒擬。未能守封植。何能固廉恥。一經可人言。三冬徒戲爾。虛信蒼蒼色。未究冥冥理。得彼既宜然。失之良有以。常言厭四

壁自覺輕千里。日夕聊望遠。山川空信美。歸飛天際沒。雲霧江傍起。安邑乏主人。臨邛多客子。鄉鄉自風俗。處處皆城市。所見無故人。含意終何已。

日夕出富陽浦口和朗公

客心愁日暮。徙倚空望歸。山煙涵樹色。江水映霞輝。獨鶴凌空逝。雙鳧出浪飛。故鄉千餘里。此夕寒無衣。

塘邊見古塚

行墳塘一孤路成。墳欲毀空疑。年代積不知。陵

谷徒幾逢秋葉黃驟見春流瀾金蠶不可織玉
對何時盡陌上驅馳人笑歌自侈靡今日非明
日所念誰怜此

下方山

寒鳥樹間響落星川際浮繁霜白曉岼苦霧黑
晨流鱗鱗逆去水瀾瀾急還舟望鄉行復立瞻
途近更脩誰能百里地縈繞千端愁

秋夕仰贈從兄寘南

堦蕙漸翻葉池蓮稍罷花高樹北風響空庭秋
月華寸心懷是夜寂寂漏方賒撫絃乏歡娛臨

觴獨嘆嗟悽愴戶涼入徘徊欄影斜無為淹戚
里見就還田家

答何秀才

寘南

自憐耿不寐擁褐至宵闌蒼茫曙月落切戾曉
風酸終朝長守餽疊夜抱餘寒周道坦既直弱
命溘將殫靈臺聊寄止戚里豈餘歡思家無積
歛何以拯急難

貽何秀才

范雲

桂葉竟穿荷蒲心爭出波有鷺鷥蘋芰綿蠻弄
藤蘿臨花空相望對酒不能歌聞君饒綺思摘

揆足爲多布鼓誠自鄙何事絕經過

酬范記室雲

林密戶稍陰草滋堦欲暗風光蕊上輕日色花
中亂相思不獨懽佇立空爲嘆清談莫共理繁
文徒可玩高唱子自輕繼音予可憚

仰贈從兄興寧賓南

家世傳儒雅真白仰餘徽宗派已孤狹財產又
貧微棲息同蝸舍出入共荆扉松筆時臨沼蒲
簡得垂帷幸逢四海泰日月耀增輝相顧無羽
翻何由總奮飛一朝異言宴萬里就睽違遠江

飄素沫高山鬱翠微相思對渺渺相望隔巍巍
死灰終不然長岑且未歸當憐此分袂脉脉泪
沾衣

見征人分別

淒淒暮暮時親賓俱竚立征人拔劍起兒女牽
衣泣候騎出蕭關追兵赴馬邑且當橫行去誰
論裹屍入

劉博士江丞朱從事同顧不值作

故人篤久要新知從暮室崎嶇枉道過邂逅幽
人出心期不會面懷之成首疾向夕敞山扉臨

窓玩餘帙蜘蛛正網戶落卷紛入膝侵滌水上
風蔽虧霞中日良辰一携手住坐無儔匹劉侯
務屬書江生勤下筆朱君博辭理去去追名實
是顧一參差何能更蓬華吾人少拘礙得性便
遊逸方欲俟褰裳相從謹道術且當謝不仕
贈王左丞僧孺
欄外鶯啼罷園裡日光斜游魚亂水葉輕燕逐
風花長墟上寒靄曉樹沒歸霞九華暝已隱抱
爵徒交加

七夕

仙車駐七襄鳳駕出天潢月映九微火風吹百
和香來謹暫巧笑還淚已沾裳依稀如洛汭條
忽似高唐別離未得語河漢漸湯湯

與蘇九德別

宿昔夢顏色咫尺思言偃何況杳來期各在天
一面踟躕暫舉酒倏忽不相見春草似青袍秋
月如團扇三五出重雲當知我憶君萋萋若被
逕懷抱不相聞

寓居公廨懷何秀才

高爽

寄止鄰城闕徒然失遊聚臥聞襍沓踏坐對空

窳宇風扉乍開闔粉蝶時翻舞若人不在茲煩
憂何得愈

答高博士

北窻涼夏首幽居多卉木飛蜨弄晚花清池映
踈竹爲宴得快性安閒聊鼓腹將子厭囂塵就
予開耳目

學古贈丘永嘉征還

龍馬魚腸劍蹀躞起風塵結客葱河返喧喧動
四鄰入墟猶憶舊德卷復疑新窺見應門出遙
識下機人相悲淚欲下離別方自陳

送韋司馬別

送別臨曲渚征人幕前侶離言雖欲繁離思終
無緒憫憫分手畢蕭蕭行帆舉舉帆越中流望
別去高樓子起南枝怨子結北風愁邈邈山蔽日
洶洶浪隱舟隱舟邈已遠徘徊落日晚歸衢並
駕奔別館空筵卷想子歛眉去知予銜泪返銜
淚心依依薄暝行人稀曖曖入塘港蓬門已掩
扉簾中看月影竹裏見螢飛螢飛飛不息獨愁
空轉側北窻倒長簾南隣夜聞織弃置勿復陳
重陳長嘆息

何集
九一
學古三首

長安美少年羽騎暮連翩玉羈瑪瑙勒金絡珊
瑚鞭陣雲橫塞起赤日下城圓追兵待都護烽
火望祁連虎落夜方寢魚麗曉復前平生不可
念空信蒼浪天

又

鞏洛上東門薄暮川流側渾渾車馬道行人不
相識日夕棲鳥遠浮雲起新色寸心空延佇對
面何由即飛輪倘易去易去因風力

又

昔隨張博望辭帝長楊宮獨好西山勇思為北
地雄十年事河外雪髯別關中季月邊秋重嚴
野散寒蓬日隱龍城霧塵起玉關風全狐君已
復半菽我猶空欲因上林鴈一見平陵桐

王尚書瞻祖日

昱昱丹旄振亭亭索蓋立金鐸謹已鳴龍輻將
復入華臺日未徙荒墳路行濕已矣將何如賓
馭皆灑泣

詠舞

管清羅薦合絃歌雪袖遲逐唱回纖手聽曲動

蠶眉疑情眇墮珥微睇託含辭日暮留嘉客相
看愛此時

從主移西州寓直齋內霖雨不晴懷郡
中遊聚

寓直慚虎賁沉迷豈職事祁祁寒枝動濛濛秋
雨駛不見眼中人空想山南寺雙桐傍欄上長
揚夾門植夙昔構良遊接膝同謹志東西忽為
阻向隅懷獨思颯颯履聲喧擾擾郡分異卧聞
復雷響坐視重扃秘欲寄一行書何解三秋意

苦熱

昔聞草木焦今窺沙石爛曠曠風逾靜曠曠日
漸暎習靜闕衣巾讀書煩几案卧思清露浥坐
待高星燦蝙蝠戶中飛蠛蠓窓間亂實無河朔
飲空有臨淄汗遺金不自拾惡木寧無榦願以
三伏晨催促九秋換

西州直示同貞

日長禁戶倦即事思短晨漏盡唱聲急此理復
傷人矛盾交爲論光璧帶成珍誓將收飲啄得
得任心神

擬輕薄篇

城東美少年重身輕萬億
拓彈隋珠丸白馬黃金飾
長安九達上青槐蔭道植
轂擊晨已喧肩排暝不息
走狗通西望牽牛亘南直
相期百戲傍去來三市側
象牀香繡被玉盤傳綺食
娼女掩歌扇小婦開簾織
相看獨隱咲見人還歛色
黃鵠悲故群山川咏新識
鳥飛過客盡雀聚行龍匿
酌羽方厭厭此時歡未極

聊作百一體

靈轍困桑下於陵拾李螭
歷齒方嗟賤炙背豈知豪
傭畊乏旅力倚市憚劬勞
曠日無豆飯方

冬缺緼袍清旦開蓬華舉
目想煎熬樞機慎僕隸
媒藥畏朋曹萬途皆自僻
一事豈他褒匆匆昨不定
負杖出蓬蒿逢施同溝壑
值設乃糠糟生途稍冉冉
逝水日滔滔咸言等木石
誰當出羽毛

看伏郎新婚

霧夕蓮出水霞朝日照梁
何如花燭夜輕扇掩紅粧
良人復灼灼席上自生光
所悲高駕動環珮出長廊

贈何郎

孫擢

幽居少怡樂坐靜對嘉林晚花猶結子新竹未
成陰夫君阻清切可望不可尋處處多謾草賴
此慟人心

野夕答孫擢郎

山中氣色滿墟上生煙露杳杳星出雲啾啾雀
隱對虛館無賓客幽居乏歡趣思君意不窮長
如流水注

下直出谿邊望谷虞徒丹敬

夫君美章句席丈珍梁楚伊余忝攝官含毫亦
禁阻直廬去只尺心期得晏語休沐乃幽栖別

離未幾許佇立日將暮相思勿無緒溪北映初
星橋南望行炬九重不可越三爵何由舉

和司馬博士詠雪

凝堦夜似月拂樹曉疑春蕭散忽如晝徘徊已
復新暫蔽卷紈質復慙施粉人若逐微風起誰
言非玉塵

石頭答庾郎丹

高樹蔭樓照

一作密

細草綠成被黃鸝隱葉飛蛺

蝶縈空戲陰岑自爾悅寂寥予罕寄相如阻禁
闈何由從簡易

詠娼婦

曖曖高樓暮華燭帳前明羅帷雀釵影寶瑟鳳
鷓聲庭花枝上發新月霧中生誰念當窓牖相
望獨盈盈

登禪岡寺望和虞記室

南望南郭門拱樹梢雲密北窓北溱道重樓霧
中出接對隱高蟬交枝承落日光陰不可捨懷
抱何由悉

車中見新林分別甚盛

金谷賓游盛青門冠蓋多隔林望行憶下阪聽

鳴珂於時春未歇麥氣始清和還入平原逕窮
巷可張羅

同虞記室諸人詠扇

如珪信非點學月但為輪機杼靡蕪妾裁縫篋
笥人搖風入素手占曲掩朱唇羅袖幸拂拭微
芳聊可因

同虞記室登樓望遠歸

登樓欲望遠遙遙見白衣白衣猶遠遠言是稍
知非對窓看瑤瑟入戶弄鳴機無今日光晚門
閣掩重扉

臨行與故游夜別

歷稔共追隨。一辭且羣匹。復如東注水。未有西
歸日。夜雨滴空堦。曉燈暗離室。相悲各罷酒。何
時同促膝。

照鏡

朱簾旦初捲。綺機晨未織。玉匣開鑑影。寶臺靜
臨飾。對影獨含笑。看花時轉側。聊為半繭眉。試
染天飛色。寶釵若何間。金鈿長相逼。蕩子行未
歸。啼粧坐沾臆。

何水部集卷一

何水部集卷二

初發新林

伊昔負薪暇。慕義遊梁楚。短翮忘連翩。追飛羨
容與。優游沐道教。漸漬淹寒暑。大德本無酬。輕
生竊自許。舟婦屬海運。風積如鵬舉。浮水暗舟
艫。合岸喧徒侶。凜凜窮秋暮。初寒入洲渚。鏡吹
響清江。懸旗出長嶼。危檣迥不進。沓浪高難拒。
回首泣親賓。中天望宛許。帝城猶隱約。家園無
處所。去矣方悠悠。含意將何語。

夜夢故人

客心驚夜魂言與故人同開簾覺水動映竹見
床空浦口望斜月洲外聞長風九秋時未晚千
里路難窮已如臃腫木復似飄飄蓬相思不可
寄直在寸心中

別沈助教

可憐玉匣劍復此飛鳧鳥未覺愛生憎忽見雙
成隻一朝別笑語萬事成疇昔道道若波瀾人
生異金石願君深自愛共念悲無益

答何郎

沈繇

歡戚遞來事聚散居常理但傷膠投漆忽作弦

離矢形影一東西山川俄表裏執手涉梁上悲
心萬端起方同兒女泣况此流潮水

渡連圻

此山多靈異峻阻實非怕湫流自洄糾激瀨視
奔騰懸岨抱竒窟絕壁駕峻嶒磳礪上爭險岵
嶇下相崩百年積死樹千尺挂寒藤詭怪終不
測迴沉意難登願欲書聞見聊以寄親朋

宿南洲浦

幽棲多暇豫從役知辛苦解纜及朝風落帆依
暝浦違鄉已信次江月初三五沉沉夜看流淵

淵朝聽鼓霜洲渡旅鴈朔颺吹宿莽夜泪坐滯
滯是夕偏懷土

望新月示同羈

初宿長淮上破鏡出雲明今夕千餘里雙蛾映
水生的的與沙靜灩灩逐波輕望鄉皆下淚非
我獨傷情

望解前水竹答崔錄事

蕭蕭藜竹映澹澹平湖淨葉倒漣漪文水漾檀
欒影相思不會面相望空延頸遠天去浮雲長
墟斜落景幽病與歲積賞心隨事屏鄉念一遭

迴白髮生俄頃

與沈助教同宿湓口夜別

我爲潯陽客戒旦乃西遊君隨春水駛鷄鳴亦
動舟共泛溢之浦旅泊次城樓華燭已消半更
人數唱籌行人從此別去去不淹留

入西塞示南府同僚

露清曉風冷天曙江晃爽薄雲巖際出初月波
中上黯黯連嶂陰騷騷急沫響迴楂急碍浪群
飛爭戲廣伊余本羈客重睽復心賞望鄉雖一
路懷歸成二想在昔愛名山自知謹獨往情游

乃落魄得性隨怡養年事以蹉跎生平任浩蕩
方還讓夷路誰知羨魚網

贈何郎

向夕秋風起野馬襍塵埃憂至猶如繞詎是故
人來檐際落黃葉堦前網綠苔遙情不入酒望
美信難哉

答丘長史

丘遲

宿昔敦遠遊名分乃異路千里泝波潮一朝披
雲霧從容捨密勿繾綣論襟趣披文極詆訶析
理窮章句明鐘信有待巨海誰能喻奔景驟西

傾還途忽東驚黃花發岍草赤葉翻高樹漁舟
乍回歸沙禽時獨赴宴年時未幾離歌倏成賦
伊我念幽關夫君思贄務短翮方息飛長轡日
先驅曝鱖走逸翮康時務掘手異沉浮佳
期安可屢

還杜五洲

我行朔已晦泝水復泂流戎傷初不辨動默自
相求睠言還九派迴艫出五洲蕭散烟霧晚淒
涼江漢秋沙汀暮寂寂蘆岍晚脩脩以茲南浦
夜重此北門愁方圓既齟齬貧賤豈怨尤

外重北日夕望江山贈魚司馬

湓城帶湓水湓水縈如帶日夕望高城耿耿青
雲外城中多宴賞絲竹常餘會篋已流悅絃
聲復淒切矜黛慘如愁舞腰凝欲絕仲秋黃葉
下長風正騷屑早鴈出雲端故燕辭檐別晝悲
在異縣夜夢還洛汭洛汭何悠悠起望西南樓
的的帆向浦團團月映洲誰能一羽化輕舉逐
飛浮

與崔錄事別兼叙携手

去夏予回首言乃重行行今春遊泝滋訪子猶

武城暫別年逾半同歸月未盈復道中寒食彌
留曠不平道術既爲務歡悰苦未并及爾沉疴
愈值茲秋序明石磧沿江靜沙流遶岸清川平
看鳥遠水淺見魚驚逝將窮履歷方欲恣逢迎
何言聚易散鄉棹爾孤征我本倦遊客心念似
懸旌聞離常層涕是別盡淒清况此忘懷地相
愛猶弟兄脉脉留南浦悠悠返上京欲鑷星星
鬚因君示友生

銅雀妓

秋風木葉落蕭瑟管絃清望陵歌對酒向帳舞

空城寂寂簾宇曠飄飄帷幔輕曲中相顧起日暮松栢聲

詠白鷗兼嘲別者

可憐雙白鷗朝夕水上遊何言異棲息雌住雄不留孤飛出岫浦獨宿下滄洲東西從此別影嚮絕無由

擬青青河畔草轉韻體爲人作其人識

節工歌

春蘭日應好折花望遠道秋夜苦復長抱枕向空牀吹臺下促節不言於此別歌筵掩團扇何

時一相見絃絕猶依軫葉落纔下枝即此雖云別方我未成離

南還道中送贈劉諮議別

一官從府役五稔去京華遽逐春流返歸帆得望家天末淨波浪日際歛烟霞岍薺生寒葉村梅落早花遊魚上急水獨鳥赴行楂目想平陵栢心憶青門瓜曲陌背通垣長墟底狹斜善隣談穀稼故老述桑麻寢興從閒逸視聽絕誼譁夫君日高興爲樂坐驕奢室墮傾城佩門交接限車入塞長雲雨出國暫泥沙握手分岐路臨

川何怨嗟

仰答何記室

劉孝綽

游子倦飄蓬
瞻途柰無窮
晨征凌迸水
暮宿犯頽風
分洲分去燕
向浦逐歸鴻
蘭芽映凍葉
葦箭穿故叢
忽憶園間柳
猶傷江際楓
吾生棄武騎
高視獨辭雄
既彈王孫產
無傾卓氏僮
罷籍睢陽囿
陪謁建昌宮
紛余似鑿枘
方圓殊未工
黑貂久自弊
黃金屢以空
吾辭追楚穆
還畊厠漢馮
巧拙良為異
出處嗟莫同
君厭蘭臺石
見訪灞陵東

櫟口守風

劉孝綽

春心已應豫
歸路復當懼
如何此日風
霾曠駭波瀾
倏見搖心慘
俄瞻鄉路難
賴有同舟客
移宴息層巒
華茵藉初卉
芳罇散緒寒
譁浪雖云善
江流苦未安
何由入故園
詎即紐新蘭
寄謝浮丘子
暫欲假飛鸞

和劉諮議守風

彌旬苦凌亂
揆景候阡陌
晝想汝陽津
夜夢邯鄲驛
憤風急驚岸
屯雲仍觸石
蕭條疾帆流
礪礪衝波白
息榜易云久
維梢晨已積
蒼蒼極浦

潮杳杳長洲夕本慙
仗飛劍空慕澹臺壁
織羅若不測
跂予中上澤

落月望水

劉孝綽

川平落月迴
落照滿川漲
復在淪波地
派別引沮漳
耿耿流長脉
熠熠動微光
寒烏逐查漾
飢鶻拂浪翔
臨泛自多美
况此還故鄉
榜人夜理楫
棹女暗成粧
欲待春江曙
爭途向洛陽

春夕早泊和諮議落月望水

旅人嗟倦遊
結纜坐春洲
日暮江風靜
中川聞棹謳
草光天際合
霞影水中浮
單艫時向浦
獨

檝乍乘流
蠻童泣垂釣
妖姬哭盪舟
客心自有緒
對此空復愁

早朝車中聽望

詰旦鐘聲罷
隱隱禁門通
璩車響北闕
鄭履入南宮
宿霧開馳道
初日照暄風
胥徒紛絡繹
騶御或西東
暫喧耳目外
還保性靈中
方驗遊朝市
此說不爲空

秋夕嘆白髮

絲白不難染
蓬生直易扶
唯見星星鬢
獨與衆中殊
昔年十四五
率性頗廉隅
直是安被褐
非

敢慕懷珙何言志事晚疲拙嬰殊軀逢時乃倏
忽失路亦斯須郊郭動二頃形體憇一廡涸蚌
困魚目籠禽觸四隅宵長壁立靜廓處謝歡愉
月色臨窓樹蟲聲當戶樞飛蛾拂夜火墜葉舞
秋株逐物均乘鶴違俗等雙鳧故人倘未弃求
我谷之隅

寄江州褚諮議

自與君別離四序紛迴薄分手清江上念別猶
如昨追憶邊城遊奚尋平生樂俱登龍從嶺共
坐透迤閣清吹或忘歸繁文時間作連鑊戲淺

草遊憶遵長薄五載同衣裘一朝異睽索夫君
頗留滯驂駢未沃若伊家從入關終是填溝壑
早秋正悽愴餘暉晚銷鑠林葉下仍飛水花披
未落如何隔千里無由舉三爵因君奏采蓮為
余吟別鶴

嘲劉郎

房櫳滅夜火窓外映朝光姹女褰帷去蹠蹠初
下床雀釵橫曉鬢蛾眉艷宿妝稍聞玉釧遠猶
憐翠被香寧知早朝客差池已鴈行

臨行公車

擾擾排曙扉，鱗鱗驅早駕。禁門儼猶閉，嚴城方
警夜。道勝夕增榮，拙薄終難化。以茲吹澗質，重
與滄溟舍。纚舟去濁河，揆景辭清灞。平生多意
緒，懷抱皆徂謝。念此將如何，撫心獨悲咤。

贈韋記室黯別

故人儻送別，停車一水東。去帆若不見，試望白
雲中。促膝今何在，啣盃誰復同。水夜看初月，江
晚泝歸風。無因生羽翰，千里暫排空。

贈何殷記室

王僧孺

掩映出南浦，驅車送上征。颺颺曉風駛，潏潏晨

川平不肖予，何惜無貲爾。勿輕倘有還鄉便，一
言訪死生。

敬酬王明府

星稀初可見，月出未成光。澄江照遠火，夕霞隱
連檣。賤軀臨不測，玉體畏垂堂。念別已零淚，况
乃思故鄉。

詠春雪寄族人治書思澄

可憐江上雪，回風起復滅。本欲映梅花，翻悲似
玉屑。朝鷺日弄響，曠條行可結。咸言不適時，安
知非矯節。

渡連圻

連圻連不極極望在雲霞絕壁無走獸窮岬有
盤楂糾紛上龍嵒穿豁下崑牙魚游若擁劒猿
挂似懸瓜陰岸生駮薛伏水沸澄沙客子行行
倦年年處處華石蒲生促節岩封落高花暮潮
還入浦夕鳥飛向家寓目皆鄉思何時見狹斜

曉發

早霞麗初日清風消薄霧水底見行雲天邊看
遠樹且望泔沂劇暫有江山趣
兔聊復起爽
池豈能賦

贈諸遊舊

弱操不能植薄伎竟無依淺智終已矣今名安
可希擾擾後役倦屑屑身事微少壯輕年月遲
暮惜光輝一塗今未是萬緒昨如非新知雖已
樂舊愛盡睽遠望鄉空引領極目淚沾衣旅客
長憔悴春物自芳菲岸花臨水發江燕逸檣飛
無由下征帆歎與暮潮歸

道中贈桓司馬季珪

晨纜雖同解晚洲阻共入猶如征鳥飛差池不
可及本願申羈旅何言異翔集君渡北江時詎

今南浦泣

春暮喜晴酬袁戶曹苦雨

振衣喜初霽。寒裳對晚晴。落花猶未捲。時鳥故
餘聲。春芳空悅目。游客反傷情。鄉園不可見。江
水徒自清。願得同携手。歸望對都城。

和蕭諮議岑離閨怨

曉河沒高棟。斜月半空庭。窓中度落葉。簾外隔
飛螢。含悲下翠帳。掩泣閉金屏。昔期今未返。春
草寒復青。思君無轉易。何異北辰星。

送別不及贈何殷二記室 朱記室

憑軾徒下淚。裁書路已賒。遠鼓依林嚮。連檣倚
岸斜。山開雲吐氣。風憤浪生花。即此余傷別。何
論爾望家。二君勗琬琰。無使沒泥沙。

暮秋答朱記室

游揚日色淺。騷屑風音勁。寒潭見底清。風色極
天淨。寸陰坐銷鑠。千里長遼迥。桃李爾繁華。松
栢余本性。故心不存此。高文徒可詠。

夕望江橋示蕭諮議楊建康江主簿

夕鳥已西度。殘霞亦半消。風聲動密竹。水影漾
長橋。旅人多憂思。寒江復寂寥。爾情深鞏洛。予

念返漁樵何因適
婦願分路一揚鑣

往晉陵聯句

臨別我傷悲送歸子自適
劉金不可散十盖何由借
遜從來重分陰未曾輕尺璧
故任情一異於是望三益
高爽爾自高樓寢予返東臯
陌寄與落毛人非復平原客
遜問舍且求田音亂無可擇
勝門成好事盤紆欲何索
爽

范廣州宅聯句

洛陽城東西卻作經年別
昔去雪如飛今來花似雪
雲濛濛夕煙起奄奄殘暉滅
非君愛滿堂

寧我安車轍
遜

詠春風

可聞不可見能重復能輕
鏡前飄落粉琴山響餘聲

送褚都曹

君隨結客去我乃倦遊歸
本願同棲息今成相背飛

送司馬入五城

隨風飄岸葉行雨暗江流
居人會應返空欲送行舟

宛中見美人

羅袖風中捲玉釵
林下耀團扇承落花
復持掩餘笑

邊城思

柳黃未吐葉水綠
半含苔春色邊城動客思
故鄉來

擬古三首

家本青山下好上青山上
青山不可上一上一上
惆悵

匣中一明鏡好鑑明鏡
光明鏡不可鑑一鑑一

情傷

少知雅琴曲好聽雅琴
敲雅琴不可聽一聽一

沾纓孝綽

為人妾怨

燕戲還簷際花飛落枕前
寸心悲不見拭泪坐調絃

為人妾思二首

魂銷形已去釵落猶依枕
欲去淚無皆不看悲復甚

機中刺綉所窓下朝粧處
未憶神已傷欲忘悲

不去

相送

客心已百念。孤遊重千里。江暗雨欲來。浪白風初起。

閨怨二首

竹葉嚮南窗。月光照東壁。誰知夜獨覺。枕前雙淚滴。

閨閣行人斷。房櫳月影斜。誰知北窓下。猶對後庭花。

苑中

苑門閉千扇。苑戶開萬扉。樓殿聞珠履。竹樹隔羅衣。

離夜聽琴

別離既有緒。琴瑟反成悲。美人多怨態。亦復慘長眉。

相送聯句

寸陰常可惜。別至倍傷神。子瞻天際水。子望路中塵。
常黯憫憫岐路側。去去平生親。一朝事千里。流涕向三春。
遜

又

昔共入門笑今成送別悲君還舊聚處爲我一
顰眉乘王江於今還促膝自此客江湄願子俱停
駕看我獨解維遜

又

高軒雖駐軻餘日久無輝以我辭鄉泪沾君送
別衣遜

慈母磯

暮煙起遥岸斜日照安流一同心賞夕暫解去
鄉憂野岫平沙合連山遠霧浮客悲不自已江
上望歸舟

至大雷聯句

高談會良夕滿酒對羈情閃閃風烟動蕭蕭江
雨聲遜密雲重浦暗飛電遠洲明若非今宴適
詎使客愁輕劉孺遥舟似連鴈遠火若迴星江
潭望如此啣卮共君傾桓季

賦詠聯句

弊履常决踵眉高起半額曼倩爾何爲獨嘆長
安索遜工商旣慚巧農士聊相易蠓腹有餘資
鴻肩方可拍江革攝職愧握蘭濫官悲執戟連
章既不敏高談豈能劇孺逸翮任奮飛窘步事

羈勒還鳥余能繫流言爾無惑
革憂懷乃千載
永歡常數刻直是悲別離非關念通塞
遜日照
汀沙素山影波浪黑爾限大江
南余歸茂陵北
臨別情多緒送歸涕如霰君望長安城予悲獨
不見
遜爾來同去國予歸方異縣懷別心歎憂
手淚方濺濺
孺

贈何記室聯句不成

江革

龍鱗無復彩鳳翅於茲鍛疇昔似翩翩今辰何
乙乙

答

日余乏文幹逢君善草札工拙既不同神氣何
由拔

又贈

刻猴雖言巧辯對今知章且欣共卮酒勿道濫
衣裳

又答

棘端雖非譬至妙安可量要知同罔象然始見
毫芒

贈新曲相對聯句

酒闌日隱樹上客請調絃嬌人挾瑟至透迤未

肯前勝劉孝舊愛今何在新聲徒自憐有曲無人

聽徒倚高樓前何澄徘徊映日照轉側被風吹

徒為相思響傷春君不知劉綺月昏樓上坐含

悲望別離已切空牀怨復看花柳枝遜

照水聯句

插花行理髮遷延去復歸雖冷水上影復恐濕

羅衣遜臨橋看黛色取渚媚鉛暉不顧春荷動

彌畏小禽飛綺

折花聯句

咲出春園裏望花聯褰纈欲以閒珠鈿非為相

思折遜日照爛成綺風來聚疑雪試采一枝歸

願持因遠別綺

搥扇聯句

紈扇已新製蕩婦復新粧欲掩羞中笑還飄袖

裏香遜在握時搖動當歌揜抑揚誰云減衣袂

影日聊自障綺

正叙聯句

竹臺歸欲礙花林出未通度簪先分影轉珥忽

瞻風遜雙橋耀珣鈿闐闐密復叢羞今桂纓闕

整插補餘空

詠早梅

兔園標物序驚時最是梅
銜霜當路發映雪擬
寒開枝橫卻月觀
蒼繞凌風臺朝洒長門泣夕
駐臨邛盃應知早飄落故逐上春來

門有車馬客

門有車馬客言是故鄉來
故鄉有書信縱橫印
檢開開書看末極行客
屢相識借問故鄉來
潺湲淚不息上言離別久
下言望應歸寸心將夜
鵠相逐向南飛

昭君怨

昔聞白鶴弄已自軫離情
今來昭君曲還悲秋
草生

草

昔聞自... 自... 今... 由... 經...

王子淵集

明君詞

蘭殿辭新寵椒房餘故情鴻飛漸南陸馬首倦
西征寄書參漢使銜帝望秦城唯餘馬上曲猶
作出關聲

凌雲臺

高臺懸百尺中夕殊未窮北臨酸棗寺西眺明
光宮城傍抵雙府林裏對相風書題鹿盧榜觀
寫飛廉銅窓開神女電梁映美人虹虞捐濫天
寵鄭膺特懷忠莊生垂翠鈞昭儀抵鬪熊馳輪

有盈缺人道亦汚隆還念西陵舞非復鄴城中

高梁乘長安有狹斜行

威行一作狹斜道車騎動相誼博徒稱劇孟遊

俠號王孫勢傾魏侯府交盡翟公門路斜勞夾

轂塗艱捲拆轅日叙宣觀眷還御宿園塗歌

楊柳曲巷飲榴花樽獨有遊梁倦還至孝文園

西宮清輕舉篇

天地能長久神仙壽不窮白玉東華檢方諸西

岳童我瞻少海北暫別扶桑東俯觀雲似蓋低

望月如弓看碁城邑改辭家墟巷空流珠餘舊

灶種杏發新叢酒釀瀛洲王劍鑄昆吾銅誰能
攬六博還當訪井公

長安道

槐衢回北第馳道度西宮樹陰連袖色塵影雜

衣風採桑逢五馬停車對兩童喧喧許史座鍾

鳴賓未窮

日出東南隅行

曉星西北沒朝日東南隅陽窓臨玉女蓮帳照

金鋪鳳樓稱獨立絕世良所無鏡懸四龍網枕

畫七星圖銀鏤明光帶金地織新襦調絃大垂

手歌曲鳳將雛採桑三市路賣酒七條衢道逢
五馬客夾轂來相趨將軍多事藝夫聳好形模
高廂照雲母壯馬飾當顛單衣火浣布利劍水
精珠自知心所愛仕宦執金吾飛甍雕翡翠繡
栢畫暑蘇銀燭附彈映雞羽黃金步搖動襜褕
兄弟五日時來歸高車竟道生光輝名倡兩行
堂上起鴛鴦七十階前飛少年任俠輕年月珠
丸出彈遂難追

牆上難爲趨

昔稱梁孟子兼閭魯孔丘訪政聊爲述問陳豈

末代多僥倖卿相盡經由臺郎百金價台
司千萬求當朝少直筆趨代皆曲鉤廷尉十年
不得調將軍百戰未封侯夜伏擁門作常伯自
有葡萄得涼州白璧求善價明珠難暗投高牆
不可踐井水自難浮風胡有年歲銛利比吳鉤

高句麗

蕭蕭易水水波燕趙佳人自多傾杯覆盃濯濯
垂手奮袖婆婆不惜黃金散盡只畏白日蹉跎

遠征人

黃河流水急驅馬送征人谷望河陽縣橋渡小

平津

明慶寺石壁

夏水懸臺際秋泉帶雨餘石生銘字長山久谷
神虛

過藏矜道館

松古無年月鵠去復來歸石壁藤爲路山窓雲
作扉

詠月贈人

月色當秋色斜暉映薄帷上弦如半壁初魄似
蛾眉渡雲光忽駛中天影更遲高陽懷許掾對

此益相思

彈碁

投壺生電影六博直仙人如何鏡奩上自有拂
輕巾隔澗疑將別隴頭如望秦握筆徒恩賦辭
短徑無陳

始發宿亭

送人亭上別被馬櫪中嘶漠漠村烟起離離嶺
樹齊落星侵曉沒殘月半山低

山池落日

竹館掩荆扉池光晦晚暉孤舟隱荷出輕棹染

苔歸浴禽時侶鼠驚羽忽彈飛

雲居寺高頂

中峯雲已合絕頂日猶晴
色居隨望近風煙對
眼生

渡河北

秋風吹木葉遠似洞庭波
常山臨代郡亭障遠
黃河心悲異方樂賜絕隴頭歌
薄暮臨征馬失道北山阿

玄圃瀆池

長洲春水滿臨汎廣川中
石壁如明鏡飛橋類

飲虹垂楊夾浦綠新桃綠樹紅
對樓還泊岸迎波斃守風漁
舟釣欲滿蓮房採半空於茲臨北
閣非復坐墟一作東

九日從駕

黃山獵地廣育門官路長
律改三秋節氣應九鍾霜曙影初
分地暗色始成光交旆長秋坂緹
幕杏間堂射馬垂雙帶豐貂佩兩
璜苑寒梨樹紫山秋菊葉黃垂露
霏霏冷輕飈颯颯傷終慚屬車對
空假侍中郎

俠客行

京洛出名謳豪俠競交遊河南期四姓關西謁
伍侯闔雞橫大道走馬出長楸桑陰徒將夕槐
路轉淹留

燕歌行

初春麗景一作日鶯欲嬌桃花流水沒河橋薔薇

花開百重葉楊柳覆池一作拂地數千條隴西將軍

號都護樓蘭校尉稱嫖姚一作目從昔別春鸞分經

年一去無不一作相親聞一作不死一作復漢地關山

一作長安月唯有一作漠北薊城雲淮南桂中明月影流

黃機上織成文克國行軍屢築營陽史討虜陷

平城城下風多能却陣沙中雪淺距停兵屬國
小婦猶年少羽林輕騎數征行遙聞陌上採桑
曲猶勝邊地胡笳聲笳人向暮使人泣還使閨
中空竚立桃花落地杏花舒桐生井底寒葉踈
試為來看上林鴈應有遙寄隴頭書

塞下一作曲

飛蓬似征客千里自長驅塞禽唯有鴈關樹但
生榆背山看故壘擊馬識餘蒲還因麾下騎來
送月支圖

入塞

戍久風塵色勳多意氣豪建章樓闕迴長安陵
樹高度冰傷馬骨經寒墜節旄行當見天子無
假用錢刀

關山月

關山夜月明愁色照孤城半形一作影同漢陣全
影一作輪滿逐胡兵灰寒光轉白風多暈欲生寄言
亭上吏遊客解雞鳴

從軍行二首

兵書久閑習征戰數曾經講戎平樂觀學戲羽
林亭西征度踈勒東驅出井陘牧馬濱長渭營

軍毒上涇平雲如陣色半月類城形羽書封信
璽詔使動流星對岸流沙白綠河柳色青將幕
恒臨斗旌門常背刑勳封瀚海石功勒燕然銘
兵勢因麾下軍圖送掖亭誰憐下玉筋向暮掩
金屏

其二

黃河流水急驄馬送征人谷望河陽縣橋度小
平津惡少多遊俠結客好輕身代風愁櫪馬胡
霜宜角筋羽書勞警急邊鞍倦苦辛康居因漢
使盧龍稱魏臣荒戍唯看柳邊城不識春男兒

重意氣無爲羞賤貧

看鬪雞

躑躅始橫行意氣欲相傾
妬敵金芒起猜群芥
粉生入場疑挑戰逐退似追兵
誰知函谷下人去獨開城

入朝守門開

直城通複道嚴駕早凌晨
鐵符行警曙銀燄未
開闔漸暗城無影晴新路不塵
屯兵引盡劍騎吹動斑輪徒知仰
春藻抽辭慙未申

古曲

青樓臨大道遊俠盡淹留
陳王金被馬秦女桂
爲鈞馳輪洛城巷鬪雞南陌頭
薄暮風塵起聊爲清夜遊

陌上桑

人傳陌上桑未曉已含光
重重相蔭映軟弱自
芬芳秋胡始倚馬羅敷未滿筐
春蚕朝已老安得久彷徨

擬飲馬長城窟

北走長安道征旅每經過
戰垣臨八陣旌門對
兩和屯兵戍隴北飲馬傍城阿
雪深無復道冰

合不成波塵飛連陣聚沙平騎跡多昏昏隴底
月耿耿霧中河羽林猶角觝將軍尚雅歌臨戎
常拔劍蒙險屢提戈秋風鳴馬首薄暮欲如何

贈周處士

我行無歲月征馬屢盤桓峭曲三危阻關重九
折難猶持漢使節尚服楚臣冠巢禽疑上幙驚
羽畏虛彈飛蓬去不已客思漸無端壯志與時
歇生年隨事闌百齡悲促命數刻念餘懼雲生
龍坻黑桑踈薊北寒鳥道無蹊徑清漢有波瀾
思君化羽翮要我鑄金丹

奉和趙王隱士

鳧鵠均長短鵬鷃共逍遙清襟蘊秀氣虛席滿
風颺斷絃唯續葛獨酌只傾瓢菖蒲九重節桑
薪七過燒

送別裴儀同

河橋望行旅長亭送故人沙飛似軍幕蓬卷若
車輪邊衣苦霜雪秋貌損風塵行路皆兄弟千
里念相親

別陸子雲

解纜出南浦征棹且凌晨還看分守處唯餘送

別人中流搖蓋影邊江落騎塵平湖開曙日細
柳發新春滄波不可望行雲聊共因

別王都官

連翩憫流客悽愴惜離群東西御溝水南北會
稽雲河橋兩隄絕橫岐數路分山川遙不見懷
袖遠相聞

送觀寧侯葬

蒙羽高峻極淮泗導清源邢茅廣列地跼萼盛
開蕃紛綸形艷彩從容璵玉溫衝飈柏幹烈
火壯曾崑疇昔同羈旅辛苦涉涼暄觀風方聽

樂垂流遽傷魂造舟虛客里高閑掩賓垣桂樹
思公子芳草惜王孫今辰向郊郭猶似背輾轉
丹旄書空位素帳設虛樽楚琴南操絕韓書舊
說存西靡傷新樹東隣惜故園自憐悲谷影彌
愴玉關門餘輝盡天末夕霧擁山根平原看獨
樹亭高望別村寂寥還蓋靖荒忙歸路昏挽鐸
已流歇歌童行自喧睠言千載後誰將遊九原

送劉中書葬

昔別傷南浦今悲去北邙書生空託夢久客每
思鄉寒近邊雲黑塵昏野日黃陵谷俄遷變松

柏易荒涼題名無復迹何處驗龜長

和從弟祐山家二首

採藥名山頂時節無春冬散雲非一色連崑異
衆峯合杳似無徑間闕定有蹤山窓臨絕頂檐
溜俯危松空林鳴暮雨虛谷應朝鍾仙童時可
過羽客屢相逢若值韓衆藥當御長房龍

其二

結交非俗士仙侶自招携少華隱日月太一尋
虹霓衆林積爲籟圍林茂成禪幽谷曙無景荒
途晝欲迷滴瀝寒泉溜叫嘯秋猿啼白雲帝鄉

起神禽丹穴棲箭篠時通徑桃李復成蹊今身
得其所群物可令齊

詠鴈

伺朝聞曙響妬隴有春聲豈若雲中鴈秋時塞
外歸河長猶可涉海濶故難飛霜多聲轉急風
踈行屢稀園池若不至不復怯虞機

和殷廷尉歲暮

歲晚悲窮律他鄉念索居寂寞灰心盡摧殘生
意餘產空交道絕財殫密戚踈空悲趙壹賦還
著虞卿書

詠霧應詔

七條開早陌五里暗朝氛帶樓疑海氣含蓋似
浮雲方從河水上預奉綠紈文

和趙王塗中

飄飄映軍幕出沒望連旗度雲還翊陣迴風即
送師峽路沙如月山峯石似眉村桃拂紅粉岸
柳被青絲錦城遙可望迴鞍念此詩

渭橋

東流仰天漢南渡似牽牛長堤通角道飛梁跨
造舟使者開金堰太守擁河流廣陵侯濤水荆

峽望陽侯波生從故舶沙漲通新洲天星識辯
對檢玉應沉鈎

陰常侍集

閒居對雨

四暝飛旦雨三逕絕來由震位雷聲發離宮電
影浮山雲遙似帶庭葉近成舟茅簷下亂滴石
竇引環流寄言一高士如何麥不收

又

蘋藻降靈祗聰明諒在斯觸石朝雲起從星夜
月離八川奔巨壑萬頃溢澄陂綠野含膏潤青
山帶濯枝嘉禾方合穎秀麥已分歧寄語紛綸
學持竿詎必知

詠石

天漢支機罷仙嶺博棊餘零陵舊是燕昆池本
學魚雲移連勢出苔駁錦紋疏還當穀城下別
自解兵書

渡岸橋

畫橋長且曲傍險復憑流寫虹晴尚飲圖星晝
不收跨波連斷岸接路上危樓欄高荷不及池
清影自浮何必橫南渡方復似牽牛

經豐城劔池

清池自湛澹神劔久遷移無復連星氣空餘似

月池夾篠澄深綠含風結細漪惟有蓮花萼還
想匣中雌

渡青草湖

洞庭春溜滿平湖錦帆張沅水菼花色湘流柱
若香穴去茅山近海連巫峽長帶天澄迥碧映
日動浮光行舟逗遠樹度鳥宿危檣滔滔不可
測一葦詎能航

和傅郎歲暮還湘洲

蒼茫歲欲晚辛苦客方行大江靜猶浪扁舟獨
且征棠枯絳葉盡蘆凍白花輕戍人寒不望沙

禽迥未驚湘波各深淺空軫念歸情

晚泊五洲

客行逢日暮結纜晚舟中戍樓因碁險村路入
江窮水隨雲度黑山帶日歸紅遙然一柱觀欲
輕千里風

五洲夜發

夜江霧裡濶新月迥中明溜痕唯識火鷲鳥但
聽聲勞者時歌榜愁人數問更

登百花亭懷荆楚

江陵一柱觀潯陽千里潮風烟望相接川路限

成遙落花輕未下飛絲斷易飄藤長遶格樹荷
生不避橋陽臺可憶處惟有暝將朝

登武昌岸望

遊人試歷覽舊跡已坵墟巴水縈非字楚山斷
類書荒城高仞落古柳細條疎煙蕪遂若此當
不為能居

和侯司空登樓望鄉

懷十臨霞觀思歸想石門瞻雲望鳥道對柳憶
家園寒田穫裏靜野日燒中昏信美今何益傷
心自有源

奉送始興王

良守別承明枉道暫逢迎去帆收錦纜歸騎指
蘭城紛糾連山暗潺湲派水清桂晚花方白蓮
秋葉始輕背飛傷客念臨岐憫聖情分風不得
遠何由送上程

江津送劉光祿不及

依然臨送渚長望倚河津鼓聲隨聽絕帆勢與
雲隣泊處空餘鳥離亭已散人林寒正下葉釣
晚欲收綸如何相背遠江漢與城闈

廣陵岸北送使

行人引去節送客艤歸艫即是觀濤處仍為郊
贈衢汀洲浪已息邗江路不紆亭嘶背櫂馬橋
轉向風鳥海上春雲雜天際晚帆孤離舟對零
雨別渚望飛鳧定知能下淚非但一楊朱

班婕妤

栢梁新寵盛長信昔恩傾誰謂詩書巧翻為歌
舞輕花月分窓近苔草共堦生接淚衫前滿單
暝夢裡驚可惜逢秋扇何用合歡名

南征閨怨

湘水舊言深征客理難尋獨怨無處道長啼不

自禁作人憎
解珮從來懶
聽音惟當有
夜鵲南飛似妾心

秋閨怨

獨暝雖已慣
秋來只自愁
火籠怕煖脚
行障鎮淋頭
眉含黛欲歛
啼將粉共流
誰能無別恨
雖守一空樓

西遊咸陽中

上林春色滿
咸陽遊俠多
城斗疑連漢
橋星象跨河
影裏看飛轂
塵前聽遠珂
還家何意晚
無處不經過

和樊晉陵傷妾

畫梁朝日盡
芳樹落花辭
忽以千金咲
長作九原悲
鏡前塵劇粉
機上網多絲
戶餘雙入燕
床有一空帷
名香不可得
何見返魂時

行經古墓

偃松將古墓
年代理當深
表柱應堪燭
碑書欲有金
迥墳由路毀
荒隧受田侵
霏霏野霧合
昏昏隴日沉
縣劍今何在
風楊空自吟

罷故章縣

秩滿三秋暮
舟虛一水濱
漫漫遵路道
淒淒對

別津晨風下散葉岐路起飛塵長岑舊知遠萊
蕪本自貧被服恒客吏正朝不繫民惟當有一
犢留持贈後人

新城安樂宮

新宮實壯哉雲裏望樓臺迢遞翔鷗仰連翩賀
燕來重欄寒露宿丹井夜蓮開砌石披新錦梁
花畫早梅欲知安樂盛歌管雜塵埃

觀釣

澄江息晚浪釣侶柁輕舟絲垂遙濺水餌下暗
通流歌聲時斷聽楫影下空浮寄言濯纓者滄

浪終滯流

聞善寺

鷲嶺春光遍王城野望通登臨情不極蕭散趣
無窮鷲隨入戶樹花逐下山風棟裏歸雲白窓
外落暉紅古石何年卧枯樹幾春空淹留昔未
及幽桂在芳叢

遊巴陵空寺

日宮朝絕磬月殿夕無扉網交雙對葉輪斷七
燈輝香盡奩猶馥幡塵畫漸微借問將何見風
氣動天衣

遊始興道館

紫臺高下極清溪，千仞餘壇邊逢藥鈿。洞裡閱
仙書，庭舞經乘鶴。池遊被控魚，稍昏蕙葉劒。欲
暝槿花疏，徒教斧柯爛。會自不凌虛。

詠得神仙

羅浮銀是殿瀛洲，玉作堂朝游雲暫起。夕餌菊
恒香，聊持履成燕戲。以石爲羊，洪厓與松子乘
羽就周王。

雪裏梅花

春近寒猶薄，梅舒雪尚飄。後風還共落，照日不

俱銷。葉開隨足影，花多助重條。今來漸非昨，向
晚判勝朝。

夾池竹

夾池一叢竹，垂翠不驚寒。葉醞宜城酒，皮治薛
縣冠。湘川淅別泪，衝嶺拂仙壇。欲見凌冬質，當
來雪後看。

侯司空宅詠妓

佳人遍綺席，妙曲動鷗絃。樓似陽臺上，池如洛
水邊。鶯啼歌扇後，花落舞衫前。翠柳將斜日，俱
照晚粧鮮。

蜀道難

王尊奉漢朝靈關不憚遙高岷長有雪陰棧屢
經燒輪摧九折路騎阻七星橋蜀道難如此功
名詎可要

晚出新亭

大江一浩蕩離悲足幾重潮落長一作猶如蓋雲
昏不作峯遠戍惟聞鼓寒山但見松九十方稱
半歸途詎有蹤

昭君怨

跨鞍今永訣垂涕別親賓漢地隨行盡胡關逐

望新交河擁寒霧隴首暗沙塵惟有孤明月猶
能送遠人

庾開府集卷上

奉和永豐殿下言志十首

立德齊今古資仁一毀譽無機抱甕汲有道帶
經鋤處下唯名惠能言本姓遽未論驚寵辱安
知係慄舒

其二

王子從邊服臨卬惜第如星橋擁冠蓋錦水照
簪裾論文報潘岳詠史答應璩帳幕參三顧風
流盛七輿

其三

茫茫實宇宙與善定馮虛大夫傷魯道君子念
殷墟程卿既開國安平遂徙居詎能從小隱終
能遊太初

其四

直城風日美平陵雲霧除來往金張館絃歌許
史間鳳臺迎弄玉河陽送婕妤五馬遙相問雙
童來夾車

其五

託情忻六學遊目愛三餘覆局能懸計看碑解
暗跡詎嘗遊魏冉那時說范睢池水朝含墨流

螢夜聚書

其六

興雲榆莢晚燒雜杏花初瀟池浸黍稷谷水播
菑畬六月蟬鳴稻千金龍骨渠含風搖古渡防
露動林於

其七

自憐循短綆方欲問長沮茂陵體猶瘠淮陽疾
未祛翻疑承毒水忽似遇昌菹漢場嗟欲盡斜
絲懼忽諸

其八

弱齡參顧問疇昔濫吹嗟綠槐垂學市長楊映
直廬連盟翻滅鄭仁義反亡徐還思建鄴水終
憶武昌魚

其九

崩堤壓故柳衰社卧寒樗野鶴能自獵江鷗解
獨漁漢陰逢荷蓀縉林見杖藜阮籍長思酒嵇
康懶著書

其十

披林求木實拂雪就園蔬濁醪非鶴髓蘭肴異
蟹蛆野情風月曠山心人事疏徒知守甕瓦空

欲報璠璣

五言和宇文京兆遊田

小苑禁門開長楊獵客來懸知畫眉罷走馬向
章臺澗寒泉反縮山晴雲倒回熊饑自舐掌鴈
警獨啣枚美酒餘杭醉芙蓉即奉盃

五言和何儀開講竟述懷

無名即講道有動定論機安弦讓禮席正業理
儒衣侶得遊焉趣能同捨講歸石渠人少歇華
陰市甃稀秋雲低晚氣短景側餘輝螢排亂草
出鴈捨斷蘆飛別有平陵迳蕭條容髮衰饑噪

空倉雀寒驚懶婦機實欣懷謏問逢君理入微
和王少保遙傷周處士

冥漠爾遊岱凄凉余向秦雖言異生死同是不
歸人昔余任冠蓋值子避風塵望氣求真隱俟
關待逸民忽聞泉石友芝桂不防身悵然張仲
蔚悲哉鄭子真三山猶有鶴五柳更應春遂今
從渭水捉釣往江濱

擬詠懷二十七首

步兵未飲酒中散未彈琴索索無真氣昏昏有
俗心涸鮒常思水驚羽每失林風雲能變色松

竹且悲吟由來不得意何必往長岑

其二

倏忽市朝變蒼茫人事非避讒應采葛忘情遂
食薇懷愁正搖落中心愴有違獨怜生意盡空
驚槐樹衰

其三

赭衣居傅岩垂綸在渭川乘舟能上月飛憶欲
捫天誰知志不就空有直如弦洛陽蘇季子連
衡遂不連既無六國印翻思二頃田

其四

...

俎豆非所習帷幄復無謀不言班定遠應為萬
里侯燕客思遼水秦人望隴頭倡家遭強娉質
子值仍留自憐才智盡空傷年髮秋

其五

楚材稱晉用秦臣即趙冠離宮延子產羈旅接
陳完寓衛非所寓安齊獨未安雪泣悲去魯悽
然憶相韓唯彼窮達慟知余行路難

其六

唯忠且唯孝為子復為臣一朝人事盡身名不
足親吳起常辭魏韓非遂入秦壯情已消歇雄

圖不復申移往華陰下終為關外人

其七

疇昔國士遇生平知己恩直言珠可吐寧知炭
可吞一顧重尺璧千金輕一言悲傷劉孺子悽
愴史皇孫無因同武騎歸守灞陵園

其八

日色臨平樂風光滿上蘭南國美人去東家棗
樹完抱松傷別鶴向鏡絕孤鸞不言登隴首唯
得望長安

其九

榆關斷音信漢使絕經過胡笳落淚曲羌笛斷
腸歌孀腰減束素別淚損橫波恨心終不歇紅
顏無復多枯木期填海青山望斷河
其十
白馬向清波乘冰始渡河置兵須近水移營喜
竈多長坂初垂翼鴻溝遂倒戈的顛於此去虞
兮柰若何空營衛青塚徒聽田橫歌

其十一

北臨玄菟郡南戍朱鳶城共此無期別俱知萬
里情昔常遊今尹今時事客卿不特貧謝富安
知死矣生懷秋獨悲此平生何謂平

其十二

悲歌度燕水弭節出陽關李陵從此去荆卿不
復還故人形影滅音書兩俱絕遙看塞北雲懸
想關山雪游子河梁上應將蘇武別

其十三

鬪麟能食日戰水定驚龍鼓鞞喧七萃風塵亂
九重鼎湖去無返蒼梧悲不從徒勞銅雀妓遙
望西陵松

其十四

搖落秋為氣，淒涼多怨情。
啼枯湘水竹，哭壞杞梁城。
天亡遭憤戰，日感值然兵。
直虹朝映壘，長星夜落營。
楚歌饒恨曲，南風多死聲。
眼前一杯酒，誰論身後名。

其十五

周王逢鄭忿，楚后值秦冤。
梯衝已鶴列，冀馬忽雲屯。
武安檐瓦振，昆陽猛獸奔。
流星夕照境，烽火夜燒原。
古獄饒冤氣，空亭多枉魂。
天道或可問，微兮不忍言。

其十六

橫流遘屯慝，上塲結重氛。
哭市聞妖獸，頽山起怪雲。
綠林多散卒，青波有敗軍。
智士今安用，忠臣且未聞。
惜無萬金產，東求滄海君。

其十七

吉士長為吉，善人終日善。
大道忽云乖，生民隨事蹇。
有情何可豁，忘懷固難遣。
麟窮季氏豈，虎振周王圜。
平生幾種意，一日衝風卷。

其十八

無悶無不悶，有待何可待。
昏昏如坐霧，漫漫疑行海。
千年水未清，一代人先改。
昔日東陵侯，唯

見瓜園在

其十九

六國始咆哮縱橫未定交欲競連城玉翻徵縮
酒茅折骸猶換子登爨已懸巢壯米初開地盲
風正折膠輕雲飄馬足明月動弓梢楚師正圍
鞏秦兵未下崤始知千載內無復有申包

其二十

懷抱獨惓惓平生何所論由來千種意併是桃
花源穀皮兩書帙壺盧一酒樽自知費天下也
復何足言

其二十一

橫石三五片長松一兩枝對君俗人眼真與理
當无埜老披荷葉家童掃栗跔竹林千戶封甘
樹萬頭奴君見愚公公真言此谷愚

其二十二

日晚荒城上蒼茫餘落暉都護樓蘭反將軍踈
勒歸馬有風塵氣人多關塞衣陣雲平不動秋
蓬捲欲飛聞道樓船戰今年不解圍

其二十三

蕭條亭障遠悽慘風塵多關門臨白社城影入

黃河秋風別蘇武寒水送荆軻誰言氣梗邑晨
起帳中歌

其二十四

被甲陽雲臺重雲久未開雞鳴楚地盡鶴唳秦
軍來羅梁猶下礮揚排久飛灰壯門車軸折吾
王不復回

其二十五

尋思萬戶侯中夜忽聲愁琴聲遍屋裏書卷滿
床頭雖言夢蝴蝶定自非莊周殘月如初月新
秋似舊秋露泣連珠下螢飄碎火流樂天乃知

命何時能不憂

其二十六

憤憤天公晚精神殊乏少一郡催曙鷄數處驚
眠鳥其學乃于于其憂唯悄悄張儀稱行薄管
仲稱器小天下有情人居然性靈夭

其二十七

在死猶可忍爲辱豈不寬古人持此性遂有不
能安其面雖可熱其心長自寒匣中取明鏡披
圖自照着幸无侵餓理差不犯兵欄擁節時驅
傳乘亭不據鞍代郡蓬初轉遼陽桑欲乾秋雲

粉絮結白露水銀圓一思探禹穴无用麈尾蘭

圖自照楊柳歌七言野美不野兵關

河邊楊柳百丈枝別有長條宛地垂河水衝激
根株危倏忽河中風浪吹可憐巢裏鳳凰兒无
故當年生別離流槎一去上天池織女支機當
見隨誰言從來陰數國直用東南一小枝昔日
公子出南皮何處相尋玄武陂駿馬翩翩四牡
馳左右彎弧仰月支連錢障泥渡水騎白玉手
板落盤螭君言丈夫無意氣試問燕山那得碑
鳳凰新管蕭史吹朱鳥春窓玉女窺銜雲酒盃

赤瑪瑙照日食螺紫琉璃百年霜露奄離披一
旦功名不可爲定是懷王作計誤無事翻覆用
張儀不如飲酒高陽池日暮歸時倒接離武昌
城下誰見移官渡營前那可知獨憶飛絮鵝毛
下非復青絲馬尾垂欲與梅花留一曲共將長
笛管中吹

奉和初秋

落星初伏火秋霜正動鍾北閣連橫漢南宮映
鑿龍祥鸞棲竹實靈蔡上芙蓉自有南風曲還
來吹九重

北莊園新齋成趙王教

虹粉跂鳥翼山節拱蘭枝畫梁雲氣繞雕窓玉
女窺月懸唯返照蓮開常倒垂盤根紐壤石行
潦暴澆池長藤連格徙高樹帶巢移鳥聲唯襍
曲花風直亂吹白虎題書觀玄熊帖射皮文絃
入舞曲翫月掩歌兒玉節調笙館金船代酒卮
若論曹子建天人本共知

奉和闡弘二教應詔

五明教已設三元法復開魚山將鶴嶺清梵兩
邊來香煙聚為塔花雨積成臺空心論佛性真

氣辨仙才露盤高掌滴風鳥平翅迴無勞問待
詔自識昆明灰

奉咏賜曾美人

月光如粉白秋露似珠圓絡緯无機織流螢帶
火寒何年迎美玉今朝得夢蘭訝許能含笑美
蓉宜熟看

就蒲州使君乞酒

蕭瑟風聲慘蒼茫雪貌愁鳥寒栖不定池凝聚
未流蒲城桑落熟霸岸菊花秋願持河北飲分
勸東陵侯

別張洗馬樞

別席慘死言離悲兩相顧君登蘇武橋我見楊
朱路關山負雪行河水乘冰渡願子著朱鳶知
余在玄菟

別周尚書弘正

扶風石橋北函谷故關前此中一分手相逢知
幾年黃鵠遂返顧徘徊愴然自知悲不已徒
勞減瑟絃

卧疾窮愁

危慮風霜積窮愁歲月侵留蛇常疾首映弩屢

驚心稚川求藥錄君平問卜林野老時相訪山
僧或見尋有菊翻無酒無弦則有琴詎知長抱
膝獨為梁父吟

率爾成詠

昔為謝安石求為淮海人彷彿新亭岸猶言洛
水濱南冠今別楚荆玉逐遊秦倘使如楊僕寧
為關外人

同盧記室從軍

河圖論陣氣金匱辨星文地中鳴鼓角天上下
將軍函犀恒七屬路鐵本千群飛梯聊度絳合

弩暫陵汾狂寇先中斷妖營即兩分連烽對嶺
度嘶馬隔河聞箭飛如疾兩城崩似壞雲英王
於此戰何用武安君

北園射堂新成

軒臺聊可習仙的不難登轉箭初調苦橫弓先
望堠驚心一鴈落連臂兩猿騰直如王濟巧誰
覺魏舒能空心不死樹無葉未枯藤擇賢方至
此傳卮欣得朋

慨然成詠

新春光景麗遊子離別情交讓未全死梧桐唯

半生值熱花無氣逢風水不平寶鷄雖有祀何
時能更鳴

奉和示內人

燃香鬱金屋吹管鳳凰臺春朝迎雨去秋夜隔
河來聽歌雲即斷聞琴鶴倒回春窓刻鳳下寒
壁畫花開定取流霞氣時添承露杯

夢入堂內

雕梁舊刻杏香壁本泥椒幔繩金麥穗簾鈎銀
蒜條畫眉千度拭梳頭百遍撩小衫裁褱臂纏
絃搯抱腰日光釵燄動窓影鏡花搖歌曲風吹

韻笙簧火灸調即今須戲去誰復待明朝
衛王贈桑落酒奉答

稔人坐狹斜喜得送流霞豉窓催酒熟停盃待
菊花霜風亂飄葉寒水細澄沙高陽今日晚應
有接離斜

望野

試策千金馬來登五丈原有城仍舊縣無樹即
新村水向蘭池泊日斜細柳園涸渚通沙路寒
渠塞水門但得風雲賞何須人事論

和王內史從駕狩

冬狩出離宮還過獵武功澗橫偏碍馬山虛絕
響弓更羸承落鴈韓盧鬪螫熊猶開三面網誰
肯一山重

對宴齊使

歸軒下賓館送蓋出河堤酒正離盃促工歌別
曲悽林寒木皮厚沙迴鴈飛低故人倘有訪知
予已執珪

同州還

赤岸繞新村青城臨綺門范睢新入相穰侯始
出蕃上林催獵響河橋爭渡喧麋雉飛橫澗藏

狐入斷原將軍高宴晚來過青竹園
侍從徐國公殿下軍行
八風占陣氣六甲候兵韜置府仍張幕麾軍即
秉旄長旄臨廣武烽火照城皋巡寒重挾纈酌
水勝單醪陣後雲逾直兵深星轉高電燄駐龍
馬山精鏤寶刁塞迥翻榆葉關寒落鴈毛旣得
從神武何須念久勞

同會河陽公新造山池聊得寓目

橫堦仍鑿澗對戶即連峯闔石疑藏虎盤根似
卧龍沙洲聚亂荻洞口碍橫松引泉恒數派開
巖即十重北閣聞吹管南隣聽擊鍾菊寒花正
合盃香酒絕濃由來魏公子今日始相逢

山齋

寂寥尋靜室蒙密就山齋滴瀝泉澆路穹窿石
卧階淺槎全不動盤根唯半埋圓珠墜晚菊細
火落空槐直置風雲慘彌憐心事乖

和吳法師遊昆明池二首

遊客重相歡連鑣出上蘭值泉傾蓋飲逢花佳
馬看平湖泛玉軸高堰歇金鞍半道聞荷氣中
流覺水寒

其二

秋光麗晚天
鷓鴣泛中川
密菱障浴鳥
高荷浸
釣船碎珠縈
斷菊殘絲繞
折蓮落光催
十酒柶
鳥送一絃

遊山

聊登玄圃殿
更上增城山
不知高幾里
低頭看
世間唱歌雲
欲聚彈琴鶴
欲舞澗底石
百重花山
根一片雨
婉婉藤倒垂
亭亭松直豎

和樂儀同苦熱

火井沉熒散
炎州高燄通
鞭石未成雨
鳴鳶不

起風思為鸞翼
扇顧借明光宮
臨淄迎子禮中
散就安豐美酒
含蘭氣甘瓜
開蜜筒寂寥人事
屏還得隱墻東

別庾七入蜀

峻嶺拂陽鳥
長城連蜀都
石銘懸劍壁
沙洲聚
陣圍山長半股
斷樹古半心
枯由來兄弟別
共念一荆株

王昭君

拭啼辭戚里
回頭望昭陽
鏡失菱花影
釵除却
月梁圍腰無一尺
垂淚有千行
衫身承馬汗
紅

袖秋霜別曲

真多恨衰絃須更張

示封中錄

貴館居金谷關荷隔藁街高階既激澗廣閣更
交柯葛巾久垂角菊逕蘭經過冀君見果顧郊
間光景佳

問疾封中錄

形骸為學官狹巷幸為閑虹迴或有雨雲合又
含寒橫湖韻鶴下迴溪狹猿還懷賢為榮衛和
緩惠綺紈

奉答賜鵝酒

雲光偏亂眼風聲特噤心冷猿披雪嘯寒魚抱
凍沉今朝一壺酒寔是勝千金負恩無以謝唯
知就竹林

詠春近餘雪應詔

送寒開小苑迎春入上林絲條變柳色香氣動
蘭心待花留對酒留雪擬彈琴陪遊媿並作空
見奉恩深

奉和平鄴應詔

天策引神兵風飛掃鄴城陣雲千里散黃河一
代清

謹贈司空淮南公

危邦久亂德天策始乘機九河聞誓衆千里見
連祈虢亡乘棘反齊平寶鼎歸久弊風塵俗殊
勞關塞衣絆驥還千里垂鵬更九飛猶憐馬齒
進應命節旄稀廻軒入故里園柳始依依舊竹
侵行逕新桐益幾圍寒谷梨應重秋林粟更肥
美酒還參聖彫文本入微歌迎趙但瑟遊弦召
楚妃小人司刺舉明時實濫吹南部治都尉軍
謀假建威南山隱士石丹水鳳凰磯野亭長被
馬山城早掩扉傳呼擁絳節交戟映彤闈遂令

六楚操何但食周薇三十六水變四十九條非
丹竈風煙歇年齒蒲柳衰同僚敢不盡疇日懼
難追

復王司徒褒

昔聞王子晉輕舉逐神仙謂言君積善還得嗣
前賢四海皆流寓非爲獨播遷豈意中台坼君
當風燭前自君鍾鼎族江東三百年寶刀仍世
載琬戈本舊傳綠綬紆槐綬黃金飾侍蟬地建
忠臣國家開孝子泉自能粘木潤足得流水圓
以君承祖武諸侯無間然青襟已對日童子即

論天穎陰珠玉麗河陽脂粉妍名高六國共價
重十城連辨足觀秋水文堪題馬鞭回鸞抱書
字別鶴繞琴絃擁麾裁甸服垂維非被邊靜亭
空擊馬閑烽直起煙不廢披書案無妨坐釣船
茂陵忽多病淮陽實未痊恃醫逾默默神理遂
綿綿永別張平子長埋王仲宣柏谷移松樹陽
陵買墓田陝路秋風起寒堂已颯馬丘楊一搖
落山火即時燃昔爲人所羨今爲人所憐世途
旦復旦人情玄又玄故人傷此別留恨滿秦川
定名于此定全德以斯全唯有山陽笛悽余思

舊篇

預麟趾校書和劉儀同

止戈典禮樂脩文盛典謨壁開金石篆河浮雲
霧圖芸香上延閣碑石向鴻都誦書徵博士明
經拜大夫壁池寒水落學市舊槐枯高談變白
馬雄辯塞飛狐月落將軍樹風驚御史烏子雲
猶汗簡溫舒正削蒲連雲雖有閣終欲想江湖

喜晴應詔勅自疏韻

御辨誠膺錄維皇稱有建雷澤昔經漁負夏時
從販柏梁驟四馬高陵馳六傳有序屬賓連無

私表平憲河堤崩故柳秋水高新堰心齋愍昏
墊樂徹憐胥怨禪河乘高論法輪開勝辨王城
水闔息洛浦河圖獻伏泉還習坎歸風已回巽
桐枝長舊圍蒲節抽新寸山藪忻藏疾幽棲得
無悶有慶兆民同論年天子萬

從駕觀降武

校戰出長楊兵欄入闔場置陣橫雲起開營鴈
翼張門嫌磁石礙馬畏鐵麥傷龍淵觸牛斗繁
弱駭天狼落星奔驥駟浮雲上驕驕急風吹戰
鼓高塵擁具裝駭獫時落木驚鴻屢斷行樹寒

條更直枝枯菊轉香伯畧推全勝龍圖揖所長
小臣忻寓目還知奉會昌

陪駕幸終南和宇文內史

玉山乘四載瑤池宴八龍黿橋浮少海鷓蓋上
中峯飛狐橫塞路白馬當河衝水奠三川石山
封五樹松長虹雙瀑布圓缺兩芙蓉成樓鳴夕
鼓山寺響晨鍾新蒲節轉促短筍籜猶重樹宿
含櫻鳥花留釀蜜蜂迎風下列缺洒洒召昌容
欣陪北山上方欲待東封

和李錄喜雨

純陽實久亢雲漢仍昭回臨池沉璧玉夾道畫
龍媒離光初繞電震氣始成雷海童還竭石神
女向陽臺雲逐魚鱗起渠隨龍骨開崩沙襍水
去卧樹擁槎來嘉苗雙合穎熟稻再含胎屬此
欣膏露逢君摛揆才愧乏將瓊玖無酬美且俛
中峯至老子廟應詔當瓜澗水與三四山
虛无推馭辨寥廓本乘蜺三門臨苦縣九井對
靈溪成丹湏竹節量藥用刀圭石似臨邛芋芝
如封禪泥氈毛新鵠小盤根古樹低野戍孤烟
起春山百鳥啼路有三千別途經七聖迷唯當

別關吏直向流沙西

忝在司水看治渭橋

大夫叅下位司職渭之陽富平移鐵鑠甘泉連
石梁跨虹連絕岸浮龜續斷航春洲鸚鵡色流
水桃花香星精逢漢帝釣叟值周王平堤石岸
直高堰柳陰長美言杜元凱河橋獨舉觴

奉和法筵應詔

五城隣北極百雉壯西昆鈎陳橫複道閭闔抵
靈軒千柱蓮花塔由旬紫紺園佛影胡人記經
文漢語翻星窺朱鳥牖雲宿鳳凰門新禽解雜

轉春柳卧生根早雷驚蟄戶流雪長河源建始
移交讓徽音種合昏風飛扇天辨泉湧屬絲言
羈臣從散木無以預中天
遙可望終類仰
鷗絃

和宇文內史入重陽關

北原風雨散南宮容衛踈待詔還金馬儒林歸
石渠徒懸仁壽鏡空聚茂陵書竹淚垂秋筍蓮
衣落故準顧城始移廟陽陵正徙居舊蘭憔悴
長殘花爛熳舒別有昭陽殿長悲故婕妤

和人日晚景宴昆明池

餘春足光景趙李舊經過上林棗署細新豐酒
泛多小船行釣鯉新盤待摘荷蘭皋徒稅駕何
處有凌波

昭君辭應詔

斂眉光祿塞還望夫人城片片紅顏落雙雙淚
眼生冰河牽馬渡雪路抱鞍行胡風入骨冷夜
月照心明方調琴上曲變入胡笳聲

對酒歌

春水望桃花春洲籍芳杜琴隨綠珠借酒就文
君取牽牛向渭橋日暝山頭晡山簡接籬倒玉

戎如意舞箏鳴金谷園笛韻平陽塢人生乙酉
年歡笑唯三五何處香錢刀求為洛陽賈

歲晚出橫門

年華改歲陰遊客喜於臨據鞍
出玉帖橫腰帶錦心水弱浮橋沒沙虛馬跡深倚弓依石岸回
牀向柳陰智瓊來勸酒文君過聽琴明朝雲雨
散何處更相尋

入道士館

金華開八景玉洞上三危雲袍白鶴度風管鳳
凰吹楚衣縫蕙葉山中簾笄皮何必淮南館淹

留板桂枝

望月

夜光流未曙金波影尚賒照人非七子含風異
九華賞新半壁上桂滿獨輪斜乘舟聊可望無
假逐仙槎

詠樹

交柯乍百頃擢本或千尋楓子留爲式桐孫待
作琴殘核依桃種空花植棗林幽居對蒙密蹊
逕轉深沉

奉和趙王西京路春日

直城龍首抗橫橋天漢分風鳥疑近日露掌定
高雲新渠還入渭舊鼎更開汾漢獵熊扳檻秦
田雉失群宜年動春律御宿歛寒氛弄玉迎蕭
史東方覓細君楊柳成歌曲蒲桃學綉文鳥鳴
還獨解開花先自薰誰知灞陵下猶有故將軍
樓船聊習戰白羽試搗軍山城對却月岸陣抵
平雲赤蛇懸弩影流星抱劍文胡笳遙警夜塞
馬聞嘶群客行明月峽猿聲不可聞

奉和趙王看伎

奉和趙王送峽中軍

綠珠歌扇薄飛燕舞衫長琴曲隨流水簫聲逐
鳳凰細苴纏鍾格員花釘鼓牀懸知曲不誤無
事畏周郎

奉和趙王美人春日

直將劉碧玉來過陰麗華祗言滿屋裏併作一
園花新藤亂上格春水漫吹沙步搖釵梁動紅
輪被輸被一作輸被角斜今年逐春處先向石崇家

春殿窮秋寄隱士

王倪逢齒缺桀溺遇長沮梨床負日卧麥隴帶
經鉏自然曲木凡無名科斗書聚花聊飼雀穿

池試養魚小村治澁路低田補壞渠秋水牽沙
露寒藤抱樹踈空枉平原騎來過仲蔚廬

正旦家賚酒

正旦辟惡酒新年長命盃柏葉隨銘至叔花逐
頌來流星向碗落浮蟻對春開成都已救火蜀
使何時來

和裴儀同秋月

蕭條依白社寂寥似東臯學異南宮敬貧同北
郭騷蒙吏觀秋水萊妻紡落毛旅人嗟歲暮田
家厭作勞霜天林木燥秋氣風雲高栖遑終不

定方欲涕沾袍

有喜致醉

忍見庭生玉聊欣蚌出珠蘭芬猶載寢蓬箭始
懸弧旣喜桺都尉能歡陵大夫頻朝中散客連
日步兵厨襍曲隨琴用殘花聽酒湏脆梨裁數
實甘粗唯一株兀然已復醉搖頭歌鳳雛

奉報寄洛州

舟師會孟津甲子陣東隣雷轅驚戰鼓劍室對
金神幕府風雲氣軍門關塞人長旂析鳥羽合
甲抱犀鱗星芒一丈燄月暈七重輪黎陽水稍

淶官渡柳應春无庸奉天
睠驅傳收南秦繁辭
勞簡牘襍俗弊風塵上
洛逢都尉商山見逸民
留滯終南下唯當一史臣

見遊春人

長安有狹斜金穴盛豪奢
連盃勸上馬亂菓擲
行車深紅蓮子艷細錦
鳳凰花那能學喫酒無
處似欒巴

和宇文內史春日遊山

遊客值春暉金鞍上翠微
風送花迎面山深雲
濕衣鴈持一足倚猿將
兩臂飛成樓侵嶺路山

村落獵圍道士封君達
仙人丁令威煮丹于此
地居然未肯歸

見征客始還遇獵

二師新受詔長平正凱歸
猶言乘戰馬未得解
戎衣上林遇逐獵宜春
整合圍漢帝熊猶憤秦
王雉更飛故人迎借問
念舊始依依河邊一片
石不復肯支機

賦得結客少年場

結客少年場春風滿路香
歌撩李都尉菓擲潘
河陽隔花遙勸酒就水
更移牀今年喜夫聳新

拜羽林郎定知劉碧玉偷嫁汝南王

幽居值春

山人久陸沉幽逕忽春心
決渠移水碓開窓掃
竹林欹橋久半斷崩岸始邪侵
短歌吹細笛低
聲泛古琴錢刀不相及耕種且
須深長門一紙
賦何處覓黃金

奉報趙王出師在道賜詩

上將出東平先定下江兵
彎弓伏石動振鼓沸
沙鳴橫海將軍號長風
駿馬名雨歇殘虹斷雲
歸一鴈征闈巖朝石濕空
山夜火明低橋澗底

度便路花中行錦車同達節
魚軒異泊營軍中
女子氣塞外夫人城
小人乖攝養岐路阻逢迎
幾月芝田熟何年金甕成
哀笳關塞曲嘶馬別
離聲王子身為寶深思不倚衡

道士步虛詞十首

渾成空教立元始正圖開
赤玉靈文下朱陵真
氣來中天九龍館倒景
八風臺雲度絃歌響星
移空殿迴青衣上少室
童子向蓬萊逍遙聞四
會倏忽度三災

其二

无名萬物始有道百靈初寂絕乘丹氣玄明上
玉虛三元隨建節八景逐迴輿赤鳳來啣璽青
鳥入獻書壞杙仍成杙枯魚還作魚栖心浴日
館行樂止雲墟

其三

凝真天地表絕相寂寥前有象猶虛豁忘形本
自然開經壬子世值道甲申年迴雲隨舞曲流
水逐歌絃石髓香如飴芝房脆似蓮停鸞燕瑤
水歸路上鴻天

其四

道生乃太乙守靜即玄根中和煉九氣甲子謝
三元居心受善水教學重香園鳧鴈報關吏鶴
去畫城門更以忻無迹還來寄絕言

其五

洞靈尊上德虞石會明真要妙思玄絕虛無養
谷神丹丘乘翠鳳玄圃御班麟移梨付苑吏種
杏乞山人自此逢何世從今復幾春海無三尺
水山成數寸塵

其六

東明九芝蓋北燭五雲車飄颻入倒景出沒上

烟霞春泉下玉霄青鳥向金華漢帝看桃核齊
侯問棗花上元應送酒來向蔡京家

其七

歸心遊太極迴向入無名五香芬紫府于燈照
赤城鳳林採珠實春山種玉榮夏笛三山響春
鍾九乳鳴絳河應遠別黃鵠來相迎

其八

北閣臨玄水南宮坐絳雲龍泥印玉策天火煉
真文上元風雨散中天歌吹分靈駕千尋上空
香萬里聞

其九

地境堦基遠天窓影迹深碧玉成雙樹空青為
一林鵠巢堪煉石蜂房得煮金漢武多驕慢惟
南不小心蓬萊入海底何處可追尋

其十

麟州一海濶玄圃半天高浮丘迎子晉若士避
盧敖經食林慮李舊食綏山桃成丹湏竹節刻
髓用蘆刀無妨隱士去即是賢人逃

登中州新閣

蹊虛凌倒景連雲詎少陽璇極龍鱗上雕甍鵬

翅張千尋文杏照十里木蘭香開堂對高掌平
坐望河梁歌響聞長樂鍾聲徹建章賦用王延
壽書須韋仲將龍來隨盡壁鳳起逐吹篳石作
芙蓉影池如明鏡光花梁反披葉蓮井倒垂房
徒然思燕賀無以預鷗翔

和從駕登雲居寺

重巒千仞塔危磴九層臺石關恒逆上山梁乍
斗迴階下雲峯出窓前風洞開隔嶺鍾聲度中
天梵響來于時忻侍從于此斲徘徊
各狩行四韻連句應詔

三川羽檄馳六郡良家選觀兵細柳城校獵長
楊苑驚雉逐鷹飛騰猿看箭轉鳴笳河曲還猶
憶江南反

和江中賈客

五兩開船頭長橋發新浦懸知岸上人遙振江
中鼓

山中

澗暗泉偏冷岩深桂絕香住中能不去非獨淮
南王

野步

值泉仍飲馬逢花即舉杯稍看城闕遠轉見風雲來

行途賦得四更應詔

四更天欲曙落月垂關下深谷暗藏人欹松橫碍馬

弄琴二首

雉飛催晚別鳥啼驚夜眠若交新曲變惟須促一絃

其二

不見石城樂唯聞鳥噪林新聲逐絃轉應得動

春心

題結綫袋子

交絲結龍鳳鏤彩織雲霞一寸全心縷千年長命花

集周公處連句

市朝一朝變蘭艾本同焚故人相借問平生如所聞

秋日

蒼茫望落景羈旅對窮秋賴有南園菊殘花足解愁

對酒

數杯還已醉風雲不復知
唯有龍吟笛桓伊能
獨吹

奉梨

接枝秋轉晚含情落更香
擎置仙人掌應添瑞
露漿

送衛王南征

重水初橫陣移營寇未降
風塵馬足起先暗廣
陵江

奉和趙王

花逕日相雋花林鳥未棲
比看中郎醉堪聞鳥
夜啼

春日極飲

檻前聞鳥嘒園裏對花開
就中言不醉紅袖捧
金杯

閨怨

明鏡圓花發空房故怨多
幾年留織女還應聽
渡河

贈別

藏啼畱送別拭淚強相參
誰言畜衫袖長代手

誰門周君子長思毫寂寥共羈旅蕭條同負郭
農談止穀稼野膳唯藜藿操樂楚琴悲亡憂魯
酒薄渭濱觀坐釣谷口看秋穫唯有丘明耻無
復榮期樂夷則火星流天根秋水涸冬嚴日不
煖歲晚風多翔揚浮有恠雲細凌聞災雹木皮
三寸厚涇泥五斗濁雖忻曲轅樹猶懼雕陵鵲
生涯實有殆天道終虛橐且悅善人交無疑朋
友數何時得雲雨復見翔寥廓

郊行值雪

風雲俱慘慘原野共茫茫雪花開六出冰珠映

九荒還如駢玉馬暫似獵銀獐陣雲全不動寒
山無物香薛君一狐白唐侯兩驪驪寒關日欲
暮披雪渡河梁

同顏大夫初晴

夕陽含水氣反景照移隄濕花飛來遠陰雲斂
向低燕燥還爲石龍殘更是泥香泉酌冷澗小
艇釣蓮溪但使心齊物何愁物不齊

夜聽搗衣

秋夜搗衣聲飛度長門城今夜長門月應如晝
日明小髻宜栗填圓腰運織成秋砧調急節亂

砑變新聲石燥砧逾響桐虛杵絕鳴鳴石出華
陰虛桐採鳳林北堂細腰杵南帝女郎砧擊節
無勞鼓調聲不用琴並結連枝縷雙穿長命針
倡樓驚別怨征客動愁心同心竹葉椀雙去雙
來滿裙裾不柰長衫袖偏宜短龍文鏤剪刀鳳
翼纏管風流響和韻哀怨悽聲斷新聲繞夜
風嬌轉滿空中應聞長樂殿判徹昭陽宮花鬢
醉眼纈龍子細文紅濕摺通夕露吹衣一夜風
玉堦風轉急長城雪應闌新綬始欲縫細錦行
須纂聲煩廣陵散杵急漁陽搯新月動金波秋

雲泛濫過誰憐征戍客今夜在交河羽觴離別
賦臨江愁思歌復令悲此中曲紅顏餘幾多

歸田

務農勤九穀歸來嘉一廛穿渠移水碓燒棘起
山田樹陰逢歇馬魚潭見酒船苦李無人摘秋
瓜不直錢社鷄新欲伏原蚕始更眠今日張平
子翻為人所憐

任洛陽酬薛文學見贈別

子居河之曲英彥本連蹤塩形成變虎鼎氣乍
成龍若人承載德宮墻定數重五衢辯關路四

照起文鋒日餘濫推轂民願始天從上洛分都尉弘農開附庸羊腸連九坂熊耳對雙峯白石仙人芋青林隱士松北梁送孫楚西堤別葛龔故人倘書禮黎陽土足封

園庭

杖鄉從物外養學事閑郊窮愁方汗簡無遇始
觀文谷寒已吹律簷空更剪荂樵隱恒同路人
禽或對巢水蒲開晚結風竹解寒苞古槐時變
火枯楓乍落膠倒屣迎懸榻停琴聽解嘲香螺
酌美酒枯蚌籍蘭殺飛魚時觸釣翳雉屢懸庖

但使相知厚能當來結交

春報賜酒

梁王脩竹園冠蓋風塵喧行人忽枉道直進桃花源稚子還羞出驚妻到閉門始聞傳上命定是賜中樽野爐燃樹葉山杯捧竹根風池還更煖寒谷遂長暄未知稻梁鴈何時能報恩

旦上司憲府

詰旦啓門攔繁辭湧筆端蒼鷹下獄吏獬豸飾刑官司朝引玉節盟載捧珠盤窮紀星移次歸餘律未彈雪高二尺厚水深一丈寒短筍猶埋

竹香心未起蘭孟門久失路扶搖忽上搏栖鳥
還得府棄馬復歸欄榮華名義重虛薄報恩難
枚乘還起疾貢禹遂彈冠方垂蓮葉劍未用竹
根丹一知懸象法誰思垂釣竿

伏聞遊獵

虞旗喜且晴獵馬向山橫石關魚貫上山梁鴈
翅行雪平尋兔跡林藜聽雉聲馬嘶山谷響弓
寒桑柘鳴聞弦鳥自落望火戰空驚無風樹即
正不凍水還平誰知茂陵下願入睢陽城

寒園即目

寒園星散後遙落小村墟遊仙半壁盡隱士
牀書子月泉心動陽文地氣虛雪花深數尺水
牀厚尺餘蒼鷹斜望雉白鷺下看魚更想東都
外群公別二邱

庾開府集卷下

奉答賜酒

仙童下赤城。仙酒餉王平。野人相就飲。山鳥一
群驚。細雪翻沙下。寒風戰鼓鳴。此時逢一醉。應
枯及更榮。

蒙賜酒

金膏下帝臺。玉曆在蓬萊。仙人一遇飲。分得兩
三杯。忽聞桑葉落。正值菊花開。阮籍披衣進。王
戎含笑來。從今覽仙藥。不假向瑤臺。

答王司空餉酒

今日小園中。桃花數樹紅。開君一壺酒。細雨三
春風。未能浮畢卓。猶足舞王戎。仙人一捧露。判
不及盃中。

蒲州刺史中山公許乞酒一車未送

細柳望蒲臺。長河始一迴。秋葉幾過落。春蟻未
曾開。瑩角非難馭。追輪稍可催。只言千日飲。舊
逐中山來。

奉和趙王遊仙

藏山還採藥。有道得從師。京兆陳安世。成都李
意期。玉京傳相鶴。太乙授飛龜。白石香新竽。青

泥美孰芝山。精還照鏡樵。客值圍碁石。紋如碎
錦藤。苗似亂絲蓬。萊在何處漢。后欲遙祠。

奉和趙王隱士

洛陽徵五隱。東都別二賢。雲氣浮函谷。星光集
潁川。灞陵採樵路。成都賣卜錢。鹿裘披稍裂。梨
床坐欲穿。阮籍唯長嘯。嵇康訝一絃。澗險無平
地。山深足細泉。短松猶百尺。少鶴已千年。野鳥
繁絃囀。山花焰火燃。洞風吹戶裏。石乳滴窓前。
雖有亭長識。終見野人傳。

奉和泛江

春江下白帝。畫舸向黃牛。錦纜迴砂磧。蘭橈避
荻洲。濕花隨水泛。空巢逐樹流。建平船。布下荆
門戰艦。浮岸社多長樹。山城足迫樓。日落江風
靜。龍吟迴上游。

奉和趙王喜雨

玄霓臨日谷。封蟻對雲臺。投壺欲起電。倚柱欲
驚雷。白沙如濕粉。蓮花類洗杯。驚鳥栖翼濕。度
鴈斷行來。浮橋七星起。高堰六門開。猶言祀蜀
帝。即似望荆臺。厥田終上上。原野自莓莓。

奉和趙王途中五韻

飄飄映軍幕。出沒望連旗。度雲還翊陣。迴風即
送師。峽路沙如印。山峯石似眉。村桃拂紅粉。岸
柳被青絲。錦城遙可望。迴鞍念此時。

奉和趙王春日

城傍金谷苑。園裡鳳凰池。細管調歌曲。長衫教
舞兒。作人長眼臉。由來薄面皮。梅花絕解作樹
葉。本能吹香煙。龍口出蓮子。悵心垂。莫畏無春
酒。須花但見隨。

上益州上柱國趙王二首

銅梁影棠樹。石鏡哀寒帷。兩江如漬錦。雙峯似

畫眉穿荷低晚蓋衰柳掛殘絲風飛盛儒雅泉湧富文詞無因同子淑暫得侍臨淄

其二

寂寞歲陰窮蒼茫雲貌同鶴毛飄亂雪車轂轉飛蓬雁歸知向爇鳥巢解背風寒山兩岸白獵火一山紅願想玄鶉弊時嗟陋巷空

五言詠畫屏風詩二十五首

俠客重連鑣金鞍被挂條細塵鄣路起驚花亂眼飄酒薰人半醉汗濕馬全驕歸鞍畏日晚爭路上河橋

其二

浮橋翠蓋擁平旦雍門開石崇迎客至山濤載妓來水紋怕獨轉風花直亂回誰能惜紅袖寧用捧金杯

其三

停車小苑外下渚一作長橋前蒹葭迎擁楫平荷直蓋船殘絲繞折藕芰葉映低蓮遙望芙蓉影只言水底燃

其四

昨夜鳥聲春驚鳴動四隣今朝梅樹下定有詠

花人。流星浮酒泛。粟瑱繞杯脣。何勞一片雨。喚作陽臺神。

其五

道遙遊。桂花寂絕到桃源。狹石分花逕。長橋映水門。管聲驚百鳥。人衣香一園。定知歡未足。橫琴坐石根。

其六

三春冠蓋聚。八節管絃遊。石險松橫植。巖懸瀨豎流。小橋飛斷岸。高花出迥樓。定須催十酒。將來宴五侯。

其七

高閣千尋起。長廊四注連。歌聲上扇月。舞影入琴絃。澗水纒窓外。山花即眼前。但願長歡樂。從今盡百年。

其八

日晚金槌絡。朱軒流水車。轆拂綠堤柳。薨飄夾路花。定迎劉碧玉。將遇陰麗華。非是高陽路。莫畏接籬斜。

其九

徘徊出桂苑。徒倚就花林。下橋先勸酒。跂石始

調琴蒲低猶抱節竹短未空心絕愛猿聲近唯
憐花逕深

其十

千尋木蘭館百尺芙蓉堂落日低蓮井行雲碍
女梁流水桃花色春洲杜若香就階猶不進催
來上伎床

其十一

搗衣明月下靜夜秋風飄錦石平砧面蓮房接
杵腰急節迎秋韻新聲入手調寒衣須及早將
寄霍嫖姚

其十二

出沒看樓殿間關望綺羅翔禽逐節舞流水赴
絃歌細管吹蕤竹新杯捲半荷南宮冠蓋下日
暮風塵多

其十三

玉柙珠簾捲金鈎翠幔懸荷香薰水殿閣影入
池蓮平沙臨浦口高柳對樓前上橋還倚望遙
看採菱船

其十四

金鞍聚積岸玉軸泛中流畫鷁先防水媒龍即

負舟沙城疑海氣石岸似江樓崩槎時半沒壞
舸或空浮定是汾河上戈船聊試遊

其十五

竟日坐春臺夫容承酒盃水流平澗下山花滿
谷關行雲數番過白鷗一雙來水影搖蕞竹林
香動落梅直上山頭路羊腸能幾迴

其十六

高閣千尋跨重簷百丈齊雲度三分近花飛一
倍低吹簫迎白鶴照鏡舞山鷄何勞愁日暮未
有夜鳥啼

其十七

河流直淺岸斂轡暫經過弓衣濕濺水馬足亂
橫波半城斜出樹長林直枕河今朝遊俠客不
畏風塵多

其十八

度橋猶徙倚坐石未傾壺淺州開長埭行營繞
細厨沙洲兩鶴迎石路一松孤印可尋丹竈何
勞憶酒壚

其十九

上林春逕密浮橋柳路長龍媒逐細州鶴髦映

垂楊水似桃花色。山如甲煎香。白石春泉上。誰能待月光。

其二十

白石春泉滿。黃金新埽開。戚里車先度。蘭池馬即來。落花承舞席。春衫拭酒盃。行厨半路待。載妓一雙迴。

其二十一

將軍急邊務。校尉罷從戎。池臺臨戚里。絃管入新豐。浮雲隨走馬。明月逐彎弓。比來多射獵。唯有上林中。

其二十二

三危上鳳翼。九坂度龍鱗。路高山裡樹。雲低馬上人。懸巖泉溜響。深谷鳥聲春。住馬來相問。應知有姓秦。

其二十三

聊開鬱金屋。暫對芙蓉池。水光連岸動。花風合樹吹。春杯猶雜泛。細菓尚連枝。不畏歌聲盡。先看筍桂欹。

其二十四

洞靈開靜室。雲氣滿山齋。古松栽數樹。盤根無

半埋愛靜魚爭樂。依人鳥入懷。仲春徵士蒲
輪上計階。

其二十五

今朝好風。中園苑足芳菲。行動蟬爭散。蓮搖魚
暫飛。面紅新着酒風晚。細吹衣。鼓石多時望。蓮
船始復歸。

徐報使來止得一相見

一面還千里相思那得論。更尋終不見。無異桃
花源。

聽歌一絕

協律新教罷。河陽始學歸。但令聞一曲。餘聲三
日飛。

看舞一首

鸞迴不假學。鳳舉自相關。到嫌衫袖廣。怕長礙
舉鬟。

移樹一首

酒泉移石襟。河陽徙石榴。雖言有千樹。何處似
封侯。

忽見檳榔

綠房千子熟。紫穉百花開。莫言行萬里。曾經相

識來

奉梨

接枝秋轉脆含銷落更香擎置仙人掌應甜甘露漿

山齋

石影橫臨水山雲半繞峯遙想山中店懸知春酒濃

咏淮南公聽琴聞絃斷

嗣宗看月夜中散對行雲一絃終獨韻猶足動文君

新月

鄭環唯半出秦鈎本獨懸若交臨酒影堪言照琴弦

仙山二首

金竈新和藥銀臺舊聚神相看但莫怯先師應識人

其二

石軟如香飴鉛銷似熟銀蓬萊暫近別海水遂成塵

賦得鸞臺

九成吹玉璫百尺上瑤臺能將秦如却終是鳳凰來

暮秋野興賦得傾壺酒

劉伶正捉酒中散欲彈琴但使逢秋菊何須就竹林

傷往二首

見月長垂淚看花守斂眉從今一別後知作幾年悲

其二

鏡塵言苦厚虫絲定幾重還是臨窓月今秋迥

照松

和侃法師前後三絕

秦關望楚路灞岸想江潭幾人應落髮看君馬向南

其二

客遊經歲月羈旅故情多近學衡陽鴈秋分俱渡河

其三

回首河堤望春春嗟離絕誰言舊國人到在他鄉別

賦得荷

秋衣行欲製風蓋漸應歇若有千年蔡湏巢但見隨

看妓

長思浣紗石空想擣衣砧臨邛若有使為說解琴心

塵鏡

明鏡如明月恒常置匣中何須照兩鬢終是一秋蓬

詠羽扇

搖風碎朝翻拂汗落毛衣定似回溪路將軍垂翅歸

寄王琳

玉關道路遠金陵音信疎獨下千行淚開君萬里書

和劉儀同臻

南登廣陵岸迴首落星城不言臨舊浦烽火照

江明

和庾四

離關一長望別恨幾重愁無妨對春日懷抱只

言秋

寄徐陵

故人倘思我及此平生時莫待山陽路空聞吹
笛悲

送周尚書弘正三首

陽關萬里路不見一人歸唯有河邊鴈秋時南
向飛

其二

交河望合浦玄菟憇朱鳥共此無期別知應復
幾年

其三

離期定已促別淚轉無從唯愁郭門外應足數
株松

春日離合二首

秦青初變曲來有遂琴心明年花樹下月月來
相尋

其二

田家足閑暇士友暫留連三春竹葉酒一曲鷓
鷗絃

入彭城館

襄君前建國項氏昔稜威鷓飛傷楚戰鷄鳴悲
漢圍世代殊民俗風雲更盛衰水流浮磬動山
喧雙飛夏餘花欲盡秋近燕將稀槐庭垂綠
穗蓮浦落紅衣徒知日云暮不見舞雲歸

怨歌行

家住金陵縣前嫁得長干少年回頭望鄉淚落
不知何處天邊胡塵幾日應盡漢月何時更圓
為君能歌此曲不覺心隨斷絃

烏夜啼二首

促柱繁絃非子夜歌聲舞態異前谿御史府中

何處宿洛陽城頭那得栖彈琴蜀郡卓家女織
錦秦川竇氏妻詎不自驚長淚落樹頭啼烏恒
夜啼

其二五言

桂樹懸知遠風竿詎更低獨憐明月夜孤飛猶
未棲虎賁誰見惜御史詎相携雖言入絃管終
是曲中啼

出自薊北門行

薊門遂北望役役盡傷情關山連漢月壠水向
秦城笳寒蘆葉脆弓凍紵絃鳴梅林能止渴樓

姓可防兵將軍連轉戰都護夜巡營燕山猶有
石須勒幾人名

燕歌行

伐北雲氣晝昏昏千里飛蓬無復根寒鴈丁丁
一本作渡遼水桑葉紛紛落薊門晉陽山頭無
箭竹疎勒城中乏水源屬國征戍久離居陽關
音信絕能踈願得曾連飛一箭持寄思歸燕將
書渡遼本自有將軍寒風蕭蕭生水紋妾驚甘
泉足烽火君訝漁陽少陣雲自從將軍出細柳
蕩子空牀難獨守盤龍明鏡餉秦嘉辟惡生香

寄韓壽春分驚來能幾日二月蚕眠不復久浴
陽遊絲百丈蓮黃河春冰千片穿桃花顏色好
如馬榆美新開巧似錢桃花一盃千日醉無事
九轉學神仙定取金丹作幾服能令華表得千
年

西門豹廟

君子為利博達人樹德深蘋藻由斯薦樵蘇幸
未侵恭聞正臣祀良識佩韋心容貌雖年代微
猷若可尋菊花隨酒馥槐影向窓臨鶴飛疑逐
舞魚驚似聽琴漳流鳴磴石銅爵影秋林

周祀圓丘歌

昭夏

重陽裡祀大報天丙午封壇肅且圓孤竹之管
雲和絃神光來下風肅然王城七里通天臺紫
微斜照影徘徊連珠合璧重光來天策輶轉鈎
陳開

皇夏

旌迴外境蹕靜郊門千乘按轡萬騎雲屯藉茹
无斜掃地唯尊揖讓展禮衡璜節步星漢就列
風雲相顧取法于天降其未祚

昭夏

日至大禮豐犧上辰牲牢修牧繭栗毛純俎豆
斯立陶匏以陳大報反命居陽兆日六變鼓鍾
三和琴瑟俎寄豆偶惟誠唯質

昭夏

圓玉已奠蒼幣斯陳瑞形成象璧氣含春禮從
天數智總圓神為祈為祀至敬咸遵

皇陽

七里是仰八陛有憑就陽之位如日之升思虔
肅肅致敬繩繩祝史陳信玄象斯格惟類之典

唯灵之澤幽顯對揚人神咫尺

雲門舞

獻以誠鬱日清山壘舉沈齊傾惟尚饗洽皇情
降景福通神明

雲門舞

長丘遠歷大電遙源弓藏高壠鼎反一作寒門
人生于祖物本于天其神配德迄用康年

登歌

歲之祥國之陽蒼灵敬翠雲長象為飾龍為童
乘長日坏蟄戶裂雲漢迎風雨六品歌雲門舞

省滌濯奠牲牲鬱金酒鳳凰樽迴天睠顧中原

皇夏

國命在禮君命在天陳誠唯肅飲福唯虔洽斯
百禮福以千年鉤陳掩映天駟徘徊彫禾飾竿
翠羽承蠱受斯茂祉從天之來

雍樂

禮將畢樂將闌迴日轡動天關翠鳳搖和鸞響
五雲飛三步上風為馭雷為車無轍迹有煙霞
暢皇情休灵命雨留甘雲餘慶

皇夏

六典聯事九司咸則率由舊章于焉允塞掌禮
移次燔柴在焉煙升玉帛氣歛牲牲休氣馨香
膋芳昭晰翼翼虔心明明上徹

皇夏

玉帛禮畢神人事分嚴承乃睠瞻仰廻雲輦路
千門玉成九軌式道移候司方廻指得一惟清
于萬斯寧受茲景命于天告成

周祀方澤歌

昭夏

報功陰澤展禮玄郊平琮鎮瑞方鼎升庖調歌

絲竹縮酒江茅聲舒鍾鼓器質陶匏列耀秀華
凝芳都荔川澤茂祉陵谷榮衛雲飾山疊蘭浮
泛齊日至之禮歆茲大祭

昭夏

曰若厚載欽明方澤敢以敬恭陳之玉帛德包
含養功藏灵迹斯箱既千子孫則百

登歌

質明孝敬求順陰陽壇有四陛琮分八方牲牲
蕩滌蕭合馨香和鑿戾止振鷺來翔威儀簡簡
鍾鼓嗶嗶聲和孤竹韻入空桑封中雲氣坎上

神光下元之主功深蓋藏

皇夏

司筵撤席掌禮移次迴顧封壇恭臨坎位瘞玉埋俎藏芬歛氣是曰就幽成此地意

周祀五帝歌

皇夏

嘉玉惟芳嘉幣唯量成形唯禮稟色隨方神班其次歲禮唯常威儀抑抑率由舊章

皇夏

惟令之月唯嘉之辰司壇宿設掌史誠陳敢用

明禮言功上神鉤陳且闢闔闔朝分旒垂象冕

樂奏山雲將迴霆策暫轉天文五運周環四時

代序鱗次王帛循迴樽俎神其降之介福斯許

青帝雲門舞

甲在日鳥中星禮東后奠蒼靈樹春旗命青史

候鴈還東風起歌木德舞震宮泗濱石龍門桐

孟之月陽之天億斯慶兆斯年

配帝舞

帝出于震蒼德于神其明在日其位居春勞以

定國功以施人言從配祀近取諸身

赤帝雲門舞

招搖指午對南宮日月相會實沉中離光布政
動溫風純陽之月樂炎情赤雀丹書飛送迎朱
絃絳鼓聲虔誠萬物含養各長生

配帝舞

以炎為政以火為官位司南陸享配離壇三和
實俎百味浮蘭神其茂豫天步艱難

黃帝雲門舞

三光儀表正四氣風雲同戊巳行初曆黃鍾始
變宮平琮禮內鎮陰管奏司中齋壇芝曄曄清

野桂馮馮夕牢芬六鼎安歌韻八風神光乃超
忽佳氣恒苾苾

配帝舞

四時咸一德五氣或同論猶吹鳳凰管尚對梧
桐園器園居土厚位總配神尊始知今奏樂還
用我雲門

白帝雲門舞

肅靈兌景承配秋壇雲高木落露白蟬寒帝律
登年金精行令瑞獸霜耀祥禽雪映司藏肅殺
萬寶咸宜厥曰上上收功在斯

萬寶同配帝舞

金行秋令白帝朱宣司正五雉歌庸九川執文
之德對越彼天介以福祉君子萬年

黑帝雲門舞

北辰為政玄壇北陸之祀員官宿設玄璜浴蘭
坎德陰風御寒吹律將迴窮紀微陽欲動細泉
管猶調于陰竹聲未入于春絃待歸餘于送曆
方履慶于斯年

青帝舞

地始坼虹始藏服玄玉居玄堂沐蕙氣浴蘭湯

匏器潔水泉香陟配彼福無彊君欣欣此樂康

周宗廟歌

皇夏

肅肅清廟巖巖寢門歌器防滿金人戒言應輦
懸鼓崇牙樹羽階變升歌庭紛象舞閑安象設
緝熙清奠春鮪初登新萍先薦優然入室儼然
在位悽愴履之非寒之謂

昭夏

永維祖武潛慶靈長龍圖革命鳳曆歸昌功移
上塲德耀中陽清廟肅肅猛虞煌煌曲高大夏

聲和盛唐牲牲蕩滌蕭合馨香和鑿戾止振鷺
來翔永敷萬國是則四方

皇夏

年祥辨日土協龜言奉酬承列來庭駿奔雕禾
飾筆翠羽承樽敬殫如此恭惟執燔

皇夏

慶緒千重秀鴻源萬里長無時猶戢翼有道故
韜光盛德必有後仁義終克昌明星初肇慶大
電久呈祥

皇夏

克昌光上烈基聖穆西藩崇仁高涉渭積德被
居原帝圖張往迹王業茂前尊重芬德陽廟疊
慶壽陵園百靈光祖武千年福孝孫

皇夏

雄圖屬天造宏畧遇群飛風雲猶聽命龍躍遂
乘機百二當天險三分拒樂推函谷風塵散河
陽氛霧晞濟弱淪風起扶危頽運歸地紐崩還
正天樞落更追原祠乍超忽畢壠或綿微終封
三尺劍長卷一戎衣

皇夏

月靈興慶沙祥發源功參禹迹德贊堯門言容
典禮禴狄徽章儀形溫德令問昭陽日月不居
歲時晬晚瑞雲纏心闕宮唯遠

皇夏

龍圖基代德天步屬艱難謳歌還受瑞揖讓乃
登壇升輿芒刺重入位據關寒卷舒雲泛濫游
揚日浸微出鄭終無反居桐竟不歸祀夏今唯
舊尊靈謚更追

皇夏

若水逢降君窮桑屬唯政不哉馭帝錄鬱美當

天命方定五雲宮先齊八風令文昌氣似珠太
史河如鏡南宮學已開東觀書還聚文辭金石
韻毫翰風飈豎清室桂馥馥齊房芝詡詡寧思
玉管笛空見靈衣舞

皇夏

南河吐雲氣北斗降星辰百靈咸仰德千年一
聖人書成紫微動律定鳳凰馴六軍命西土甲
子成東鄰戎衣此一定萬里更無塵煙雲同五
色日月並重輪流沙旣西靜蟠木又東臣凱樂
聞朱鴈銑歌見白麟今爲六代祀還得祀疑賓

成文繼天爰立長安民乃樹君其明廣如日其
澤厚如雲惟昔我文祖撥亂拒謳歌三分未撫
運八百不陵河禮敷天下信樂正神人和風塵
行息警江海欲無波

其二

我皇承下武革命在君臨應圖當舜玉嗣德受
堯琴沈首多推運陽城有讓心就日先知遠觀
淵早見深玄精實委御蒼正乃皆平履端朝萬
國年祥慶百靈玉帛咸觀禮華成各在庭鳳響
中夷則天文正玉衡皇基自天保萬物乃由庚

其三

握衡平地紀觀象正天樞祺祥鍾赤縣靈瑞炳
皇都更受昭華玉還披蘭葉圖金波來白兔弱
木下蒼烏玉斗調元協金沙富國租青丘還擾
圃丹穴更巢梧安樂新成慶長生百福符

其四

明明九族序穆穆四門賓陰陵朝北附蟠木引
東臣澗途求板築溪源取釣綸多士歸賢戚維
成屬茂親貴位連南斗高榮據北辰迎時乃推
策司職且班神日月之所照霜露之所均永從

文軌一長無外戶人

其五

鬱盤舒棟宇崢嶸侔大壯拱木詔林衡全模徵
梓匠千楹綺翼浮百拱長虹抗北去邯鄲道南
來偃師望龍首載文槐雲楣承武帳居者非求
隘卑宮豈難尚壯麗天下觀是以從蕭相

變宮調二首

帝遊先出震君明擅在離嚴廊唯眷顧欽若尚
無為龍穴非難附鸞巢欲可窺具茨應不遠汾
陽寧足隨烝民播植重溝洫劬勞多桑林還注

雨積石途開河明徵逢永命平值秩年和更有
薰風曲方聞晨露歌

其二

移風廣軒曆崇德盛唐年成文興大雅出豫動
鈞天黃鍾六律正閭闔八風宣孤竹調陽管空
桑接雅絃舞林鸞更下歌山鳳欲前聞音能辯
俗聽曲乃思賢感物觀治亂心防未然君子
德其道太平何有焉

商調曲四首

君以宮唱寬大而謨明臣呂商應聞義則可行

有能為政訪道于容成殷湯受命委任于阿衡
忠其敬事有罪不逃刑誦其箴諫言之無隱情
有剴有斷四方可以寧既頌既雅天下乃升平
專精一致金石為之開動其兩心妻子恩情乖
苟利社稷無有不盡懷昊天降祐元首唯康哉

其二

百川俱會大海所以深群材既聚故能成鄧林
猛虎在山百獸不敢侵忠臣處國天下無異心
昔我文祖執心且危慮驅剪豺狼經營此天步
今我受命又無敢逸豫惟有弼諧各可知競懼

其三

禮樂既正神人所且和玉帛有序志欲靜于戈
各分符瑞俱誓裂山河今日相樂對酒且當歌
道德以喻聽撞鍾之聲神姦不若觀鑄鼎之形
豐官既朝諸侯于是穆岐陽或狩淮夷自此平
若涉大川言憑于舟楫如和鼎實有寄于鹽梅
君臣一體可以靜氛埃得人則治何世無奇才

其四

風力是舉而名階序平重黎既登而天地位成
功無與讓銘太常之旌世不失職受駢毛之盟

輯瑞班瑞穆穆于堯門惟翰唯屏膺膺于周原
功成而治定禮樂斯存復子而明辟姬且何言

角調曲二首

止戈見于絕轡之野稱伐聞于丹水之征信義
俱存乃先忘食五材並用誰能去兵雖聖人之
大寶曰位實天地之大德曰生涇渭同流清濁
異能琴瑟並御雅鄭殊聲擾擾烝人聲教不一
茫茫禹跡車軌未并志在四海而尚恭儉心包
宇宙而無驕盈言而無文行之不遠義而無立
勤則無成惻隱其心訓以慈惠流宥其過哀矜

典刑

其二

匡贊之士或從漁釣雲雨之才乍嘆幽谷尋芳
者追深徑之蘭識韻者採窮山之竹克明其德
貢以三事樹之風聲言于九牧協用五紀風若
從事農用八政甘作其穀殊風共軌見之周南
異畝同穎聞之康叔祁寒暑雨是無胥怨天覆
雲油滋焉滲漉幸無謝上古之淳人庶可以封
之于比屋

徵調曲六首

乾坤以含養覆載日月以貞明照臨達人以四海為務明君以百姓為心水波瀾者源必遠樹扶踈者根必深雲雨取施無不洽廊廟求才多所任

其二

淳風布政常無欲至道防人能變俗求仁義急于水火用禮讓多于菽粟屈軼無佞人可指獬豸無繁刑可觸王道蕩蕩用無為天下四人誰不足

其三

聖人千年始一生黃河千年始一清攝提以之而從紀玉燭于是而文明東南可以補地闕西北可以正天傾浮龜則東海可屬厲一作運鍾則南山可平眾仙就朝于瑤水群帝受享于明庭懷和則韎任並奏功烈則鍾鼎俱銘

其四

三光以記物成形四時以裁成正位雷風大山岳之響寒暑通陰陽之氣武功則六合攸同文教則二儀經緯有道則咸浴其德好生則各繁其類白日經天中則移明月橫漢滿而虧能虧

能缺既無為雖盈雖滿則不危開信義以為苑
囿立道以為城池周監二代所損益郁郁乎其
文可知庖犧之親臨佃漁神農之躬秉耕稼湯
則救旱而憂勤禹則正冠而無暇草上之無不
偃君子之眈知可化將欲比德于三皇未始追
踪于五霸

其五

纖纖不絕林薄成涓涓不止江河生事之毫髮
無謂輕慮遠防微乃不傾雲宮乃垂拱大君鳳
曆唯欽明元首類上帝而禋六宗望山川而朝

群后地鏡則山澤俱開河圖則魚龍合負我之
天網莫不該閭闔九關天門開卿相則風雲玄
感匡贊則星辰下來既興周室之三聖乃舉唐
朝之八才莘臣參謀于左相文老教政于中台
其宜作則于明哲故無崇信于姦回

其六

正陽和氣萬類繁君王道合天地尊黎人耕植
于義圃君子翱翔于禮園落其實者思其樹飲
其流者懷其源外繇為謀不仁遠士會為政群
盜奔克寬則昆蟲乃向彰信則殊俗宅心浮橋

有月支抱馬上苑有烏孫學琴赤玉則南海輸
賚白環則西山獻琛無勞鑿空于大夏不待蹶
角干蹄林

羽調曲五首

樹君所以牧人立法所以靜亂首惡既其南巢
元凶于是北竄居休氣而四塞在光華而兩旦
是以雨施作解是以風行唯渙周之文武洪基
光宅天下文恩千載克聖咸熙七百在我應期
實昊天有成命惟四方其訓之

其二

運平後親之俗時亂先疎之雄踰桂林而驅象
濟弱水而承鴻既浮于呂之氣還吹入律之風
錢則都內貫朽倉則常平粟紅火中乃寒乃暑
年和一風一雨聽鍾磬念封疆聞笙竽思蓄聚
瑤琨篠簜既從怪石鉛松即序長樂善馬成羸
水衡黃金爲府

其三

百川乃宗巨海衆星是仰北辰九州攸同禹跡
四海合德堯臣朝陽栖于鳴鳳靈時牧于般麟
雲玉葉而五色月金波而兩輪涼風迎時北狩

小暑戒節南巡山無藏于紫玉地不受于黃銀
雖南征而北怨實西畧而東賓既未清于四海
終有慶于一人

其四

定律零陵玉管調鍾始平銅尺龍門之下孤桐
泗水之濱鳴石河靈于是讓珪山精所以奉璧
滌九川而賦稅柔三危而納錫北里之禾六穗
江淮之茆三脊可以玉檢封禪可以金繩採冊
終永保于鴻名足揚光于載籍

其五

太上之有立德其次之謂立言樹善滋于務本
除惡窮于塞源冲深其智則厚昭明其道乃尊
仁義之財不匱忠信之禮無繁動天無有不屆
唯時無幽不徹作德心逸日休作偽心勞日拙
自非剗克掩義無所離于勦絕

望渭水

樹似新亭岸沙如龍尾灣猶言吟暝浦應有落
帆還

和濟池初成清晨臨泛

千金高堰合百頃凌源開翻逢積草浪更識昆

明灰猿嘯風還急雞鳴潮即來時看青雀舫遙
逐貴州廻

舟中望月

舟子夜離家開舫望月華山明疑有雪岸白不
關沙天漢看珠蚌星橋視桂花灰飛重暈闕賞
落獨輪斜

喜晴

比日思光景今朝始暫逢雨注便生熱雲暗即
作峯水白澄還淺花紅燥更濃已歡無石燕彌
欲弃二龍

晚秋

凄清臨晚景踈索望寒階濕庭初學記凝墜露
搏風捲落槐日氣斜還冷雲峯晚更霾可憐數
行鴈點點遠空排

和山池

樂官多暇豫望苑斲迴輿鳴笳凌絕恨飛蓋歷
通渠桂亭花未落桐門葉半踈荷風驚浴鳥橋
影聚行魚日落含山氣雲歸帶雨餘

奉和夏日應令

朱簾捲麗日翠幕蔽重陽五月炎蒸氣三時刻

漏長麥隨風裏熱梅逐雨中黃開冰帶井水和
粉雜生香衫含蕉葉氣扇動竹花涼早菱生軟
角初蓮開細房願陪仙鶴舉洛浦聽笙簧

舞

洞房花竹明燕餘雙舞輕頓履隨踈節低鬟逐
上聲伴類聚轉行初進衫飄曲未成鸞迴鏡欲
滿鶴顧市應傾已曾天上學詎見類聚地中生

重別周尚書

陽關萬里道不見一人歸唯有河邊鴈秋來南
向飛河橋兩隄絕橫岐數路分山川遙不見懷

袖遠相聞

送吳法師葬

龍泉今日掩石洞即時封玉匣摧談柄懸河落
辨鋒香爐猶是柏塵尾更成松郭門未十里山
迴已數重尚聞香閣梵猶聽竹林鍾送客風塵
擁寒郊霜露濃性靈如不滅神理定何從

梅花

常年臘月半已覺梅花闌不信今春晚俱來雪
裏看樹動懸冰落枝高出手寒早知覓不見真
悔着衣單

舞媚娘

朝來戶前照鏡含笑盈盈自看眉心濃黛直點
額角輕黃自安祇疑落花謾去復道春風不還
少年唯有歡樂飲酒那得留殘

晚秋和穎川公秋夜

沈寥空色遠葉黃凄序變洞浦落樽鴻長飈送
巢燕千秋流夕景百籟含霄轉峻雉聆金柝曾
臺切銀箭

將命至鄴

大國脩聘禮新隣自此敦張旃事原隰賓序報

成言西過犯風露北指度輾轅交歡值公子展
覲過王孫何以譽嘉樹徒忻賦采繁四年盈折
俎三獻盡壘樽人臣無境外何日忻此言風俗
既殊阻山河不復論無因旅南館空欲登西門
眷然此別風期幸共存

將命至鄴酬祖正員

我王臨九有聲教泊無堤興文盛禮樂偃武自
氓黎承乏驅騏驥旌旗事琬珪古碑文字盡荒
城年代迷被隴文瓜熟交騰香穗低投瓊實有
慰報李更無蹊

聘齊秋晚館中飲酒

忻茲河朔飲對此洛陽才殘秋欲屏扇餘菊尚
浮盃漳流鳴二水日色下三臺無因侍清夜同
此月徘徊

奉和同泰寺浮屠

岩岩凌太清照殿北東京長影臨雙闕高層出
九城拱積行雲礙幡搖度鳥驚花飛如始落蓮
合似初生輪重對月滿鐸韻擬鸞聲書水流金
注圖雲色玉行輕一作烟露晚一作猶滴珠朝火
更明雖連博望苑還接銀沙城天香下桂殿仙

梵入伊笙庶同八界樂方遣六塵情

仰和何僕射還宅懷故

紫閣思朝罷中臺文奏稀無復千金笑徒勞五
日歸步簷朝未掃蘭房晝掩扉苔生理曲處網
積迴紋機故瑟餘絃斷歌梁秋燕飛朝雲雖可
望夜悵定難依願憑甘露入方假慧燈輝寧知
洛城晚還淚獨沾衣

